

ASO LUA, 27 IUNI 2023

Na toe amatalia Taulumaga a le Fono Aoaofaitulafono i le itula e 1:55 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2023/2024.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono. I le toe taliu mai ai o le tatou malologa e i ai le manatu ua matu i fau le tautega sa alo i ai le paia o le tatou Maota, ua maua foi se malosi faasili e faaauau ai pea le tatou galuega.

E faataatiese a tatou Taulumaga o lo o saunoa le sui usufono tamaitai mo Aleipata Itupa i Lalo. O le mea lea ou te tapa ai ma le agaga faaaloalo lau Afioga i le sui mamalu e tulai mai e faaauau lau saunoaga.

Afioga FAAGASEALII SAPOA FEAGIAI: Ia faafetai i lau Afioga i le Fofoga Fetalai, faafetai foi i le Atua i lenei itula ona o lana foai e ala i taumafa ua maua ai se faasiliga malosi a le paia ma le mamalu o le usugafono i lenei itula. Faafetai atu ai i le Failautusi ma le Ofisa o le Fono ona o tapenaga uma.

A o lenei itula e tusa ai ma le faafesili a le Afioga i le Minisita o Siosiomaga, ia o le poloketi lea pei ona faafesiligia o i i Lotopue i Aleipata, o le toga togo. Ia pei sa talosagaina ona o le footpath i totonu, na o se auala a e savali ai Turisi ia ma tilotilo i lalo i i'a ma pa'a o lo o fetolofi i lena ogasami. Ia, ae o le itu foi i le faaaogaina ia ua ala ona faaaoga e nai tagata ua lapopoa, ua ono aina ia mea. Ia o le mea foi lena e faamalulu atu ai i lau Afioga i lea tulaga ona ua faaaoga ai e le afioaga nei foi taumafa o lo o maua i lea ogasami.

Ia a o le Afioga i le Minisita o le Soifua Maloloina ona e le o maua atu, leai e momoli atu le faafetai tele lava e le tau selu atu i le Afioga i le Minisita o ia o lo o i ai le ki ma le tatala o nei mea uma. Ia o lea foi ua faalogologo atu ia o le a taatia atu i autafa o lau Afioga e te silasila ifo i ai i le gasegase o lo o aafia ai tausisoifua o le tatou atunuu.

Ia lau Afioga i le Fofoga Fetalai pau lea o nai manatu ua mafai ona faaleoina i lenei itula o le aso ia ae tau ina faamanuia tele le Atua i lau Afioga

foai pea lou malosi aua le faafoeina o ou tiute. Faamanuia foi le Atua i Minisita uma lava o le Kapeneta ua le mafai ona oo atu i ai se leo, ia malo faafetai mo galuega lelei aua le atinaeina o le tatou atunuu.

Ia faafetai atu foi ma faamalo i Faauluuluga o Matagaluega taitasi ia aemaise o Pisinisi Tumaoti e tusa ai foi ma le galuega fita ma le atinaeina o le tatou atunuu.

Ia manuia tele usugafono i lenei afiafi ia faamanuia le Atua. I le Suafa o Iesu, amene.

FOFOGA FETALAI: Malo faafetai, ia faamalo a saunoa faafetai foi i nisi o fautuaga ua tuuina aemaise foi nisi foi o mea o finagalo i ai le Itumalo, ia malo a faafetai lea ua faafogafoga atu le Kapeneta.

Ia ua maua le avanoa mo se tasi o sui o le Komiti, ia tulai maia le sui usufono mamalu mai Aana Alofi Nu.3.

Afioga AGASEATA VALELIO TANUVASA PETO (Aana Alofi 3): E momoli le agaga o le faafetai tele i lau Afioga i le Fofoga Fetalai mo le avanoa o lenei sui usufono ma le usugafono, a o le tapuaiga mamalu foi a lenei Itumalo o Aana Alofi Nu.3. E i ai la le taofi e le toe taluaina le fala o poula ma sasama le lafialuga i le eleiga i lau faatulima o le faasani ma le faamua i le Atua lea ua maea ona e fana i le lagi le afimua nai le itulagi lea i Lana pule faasoa ma Lana pule faasoifua ma lou ola ua mafai ai ona faatino tatou feau ma galuega o lenei aso.

Ae tau ia ina ou sosoli faaniuvaai soliga o le fogatia lele ua malumaunu. Tulouna la le paia o le Maota, le paia o le Palemene o Samoa, a o Samoa foi o le atunuu tofi, ua uma ona tofi tofi Tupu, o Aiga o Tupu, Aiga o Nofo, Aiga o Papa ma Aiga le Tafai. E leai a se tasi na te toe sii se matalalaga aua ua taoto ma mautu ana faiga faavae.

Ae ua ou tulai atu i le ava ma le faaaloalo tele se i taumafai atu se sao o lenei Itumalo o Aana Alofi Nu.3 i nai o'u afioaga ia Nofoalii ma Leulumoega aua lava le felafolafoaiga ma le Tala Faatatau o le Tupe, le Tala Faatatau Autu o le Tupe 2023/2024. E fua foi le lauga ona o aulape o le Komiti o Tupe.

Lau Afioga i le Fofoga Fetalai sa tatou folau mai faatasi e faamaite le faatupulaia o le tamaoiga ina ia mausali mo le manuia o Samoa. O le faamaite i faiga faavae fou e mafai ona faatupulaia ai le tamaoiga e ala i le galulue faatasi e faatino faamaite e pei ona iai le ulutala o le Tala o le Tupe 2022/2023. A o lea ua iai le 2023/2024 faimai lona faaulutalaina. Tapueina ma Faamautuina o Alamanuia e gafataulimaina mo le soifua manuia lautele.

O le ala lea e momoli atu ai le agaga o le faafetai tele i lau Afioga i le Minisita o Tupe, lau Afioga i le Pule Sili aemaise le Matagaluega aua o la outou matafaioi o le aoina lea, faamaopoopo ma faasoasoaina. Ou te talitonu i lo outou fitaituga ai i le tapenaina o lenei Tala o le Tupe, a outou galuega

patino o le aoina mai ma faamaopoopo ma le tau faasoasoa tatauinā ma le atoatoa o nai a tatou tupe mo Matagaluega, Faalapotopotoga Tumaoti e oo lava i Nuū ma Afioaga o Aiga ma tagata taitoatasi. Malo le galulue, faafetai tautua faafetai faasoa.

O le taunuuga o lenei Tala Faatatau Autu o le Tupe 2023/2024 ou te faaupūina, E tua le anoāfale i le anofale i le anofale ua e mama ma ponoī mo le anoafale, o ou tagatanuu ma tagata lautele. O le mea moni lau Afioaga i le Fofoga Fetalai o le Maota o le lelei faafoeina o le faatinoga ma le limataitaiina i faiga faavae a le Malo, Vaega Maoti ma Faalapotopotoga Tumaoti ma le galulue faatasi o Itutino eseese ua afua ai ona ausia i se laasaga maoae le tapenaga o lenei tausaga faaletupe. E ui a o se fuafuaga mo lena tausaga faaletupe ae ua lava faailoilo ma taunuuga mautinoa o lenei tausaga faaletupe o le a faamaeaina nei e fai ma molimau o le siitia o le tatou tamaoaiga. O le tamaoaiga o Samoa o le tamaoaiga e fautele, o le mea moni tofu sao uma tagata taitoatasi mai lava i Matagaluega ma Faalapotopotoga mo le atinaeina o lo tatou Atunuu. O fesoasoani tuusao i pisinisi laiti, o pisinisi tau Turisi aemaise ai polokalame mo le atinaeina o Itumalo o se faamaite ua mafai ai ona siitia lo tatou tamaoaiga. O le lelei faafoe ma le maeaea o le aoina mai oa tatou tupe, faafetai ai le Matagaluega o Tupe maua ma lafoga leaga o i na iai le latou anavatau ma le ivitu o le latou faamoemoe taulai i le Tala o le Tupe ua tuanai. A lelei, sagatonu le aoina mai o tatou lafoga aemaise ai a tatou aitalafu tuua o le a faapena ona taumanuia ai le faamoemoe o lenei tausaga. E pei ona maua ai a tatou tupe faasili mai Matagaluega ma Faalapotopotoga. O le puleaina lelei o se tasi ia o faiga faavae ua matauina le ausia i sona tulaga maoae, lea la ua mafai ai ona faataunuu ma faatupe ai le siitaga o totogi mo tatou tagata faigaluega a le Malo. Faafetai tele, ua tua ai i i le mafatiaga o lo o feagai ma tagata faigaluega i le taugata o le soifuaga. Ua avea ia le siitaga o totogi ua fai ma lavefau e fai ma laveai a o feagai ai tatou ma le taugata o le soifuaga.

O le faatupeina foi mo nai o tatou tagata e iai aafiaga tumau, o se laasaga sili lea ona taua. O le totogiina o tatou aitalafu ma le faasafuaina atu i Itumalo taitasi o tupe mo le faaogaina e Itumalo e atinae ai Itumalo taitasi. Lau Afioaga i le Fofoga Fetalai ua manino ai le agaga o le Malo ma lana anavatau ma lana faatofalaiga, ia avanoa tutusa tagata uma i lana faasoa, ia unaia tagata uma e atinae e pei ona iai faamaite e tapue ma faamautu alamanuia gafataulimaina, lea ua atagia mai i le faasoa le anofale o lea lava ua e mama ma ponoī mo Samoa. O faamanuiaga mo so o se tasi ua tuuina lava i aao mo le atinaeina.

O le agaga lea o le faafetai ina ua mafai ona tatou ausia nei matatia tetele aua lava le atinaeina o lo tatou Atunuu.

Ae oo lava se matou leo ma se matou fautuaga e tusa ai foi ma le tatou Tala o le tupe ua faatalanoaina nei.

O le tau o oloa ua matauina le taimi e tuuitiitia ai oloa e amata mai lava i Kamupani o lo o latou faaulufaleina mai nei oloa ma faasolo mai ai i faleoloa i tua i Nuu ma Afioga. Ua matauina o oloa nei sa aumai i tau maualalalo, ae a oo loa ina tuuitiitia ia ona faapena lea ona maualuga le siitaga. O le tatalo ia sei silasila ane i lea vaega ia tatou faiga faavae. E ui lava i le vaega lea, o le demand and supply a o lou taofi o oloa nei na ese le tau na aumai ai. O le tatalo lea ma le fautuaga i le Komiti ia aemaise le matagaluega e feagai ai.

O le Matagaluega o Tina ma Tamaitai, lau Afioga i le Minisita ua matauina ua faapena ona aapa ia tatou Fono Faavae aua lava le faatinoina oa tatou aualagalua i totonu o Nuu ma Afioga. A o le tatalo ma le faamanatu, iai se faiga faapaaga a le tatou Matagaluega o lo o fitoitonu i ai le tatou tai miliona faatasi ai ma le Matagaluega o Galuega Tetele e ala atu i le LTA. E iai se faigapaaga ina ia faapena ona iai se tasi e galue e faatinoina ia survey o auala taitasi ma maua mai ai le tau. O lou talitonuga o i o lo o iai le atoaga, o lo o iai le atamai e iai le fuafuaina o vaega nei, e le fai taumatea a o le agaga lena.

O lona lua i fautuaga lava pe le ua alagatatau ona fai faapaaga le Fono Faavae ma le Matagaluega lava lea o galuega ae faatulaga ai le tupe maoti i Fono Faavae e faatino ia latou galuega e ala i aualagalua. A o le isi vaega faaoga mai iai le Afioga lea, faatinoina lea e le Afioga i le Minisita ma le Matagaluega, o le vaeveaina lea o se portion, o le a ni pasene, e fia le pasene e faatinoina ai e ala mai le tupe lea o le miliona ae faapena ona faamaea e le tatou Matagaluega ma le LTA. O vaivaiga ia. O le tauau lea e tuuina atu ina ia faamama ai le avega o manaoga o lo o faapena ona lafo atu aua lava le atinaeina o Nuu ma Afioga e ala lava i aualagalua.

Ona oo mai lea i manaoga o si ou Itumalo, lau Afioga i le Minisita o Galuega Tetele, Pulega o le Suavai. O le vai taumafa i Leulumoega-uta, ua ato i lenei tausaga le 61 tausaga talu ona tatou Tutoatasi, o le 61 foi lea o tausaga e lei taumafa lava lenei pitonuu i se suavai mama. Le pitonuu e agai mai i Lefaga, o le auala o lo o taua o le Alamaligi. E tau mai lava i le igoa o le auala o le leva, leva ona faaogaina lenei auala ma tagata o lo o faapena ona nofoia ai. Lau Afioga i le Minisita o le agai mai o le vai mai uta i Lefaga faafesagai tonu lava ma le auala i Aleisa o i ina o lo o muta ai le auaunaga a le Suavai. A o le faaauauina mai seia pa'ia ia le magafa o lo o iai ia pamuvai i le magafa i Nofolii ma Leulumoega, o nai Aiga o lo o iai le va lena o lo o moomia ma e iai le latou talosaga lea na faapena ona tuuina mai e faaleo atu i lau Afioga i le Minisita.

Lau Afioga i le Minisita o Faalapotopotoga o Fanua, o le tolu ai lenei o taumafai pea e taulogologo atu se tuualalo ma se talosaga. E pei a ona ou taua o lenei ua taunuu atu faamanuiaga e ala i le tatou tupe tai miliona ma ua atinae ai Nuu ma Afioga. Ae paga lea, paga lea ua utiuti ma ua le lava fanua, peitai o totonu o tuamaota, tualaoa o le Nuu nei o lo o le 180 acre a

le Malo. O le tatalo lena i lau Afioga i le Minisita sei faamatuu maia ae sei faaaogaina e faatino ai atinae ma galuega atinae a lenei Nuu.

Tofa Hon Leatinuu Wayne Soialo: Lau Afioga i le Fofoga Fetalai pe maua se avanoa.

FOFOGA FETALAI: Ia malie lau Afioga i le Sui mamalu sei tuu atu le avanoa i le Afioga i le Minisita o Pisinisi, Alamanuia ma Leipa. Ia lau Afioga i le Minisita.

Tofa Hon Leatinuu Wayne Soialo: Ia faafetai lava i le Afioga i le Sui mo le manatu foi ua faalia i lenei aso. Ae ao ona aveatu pea se faamalamalama foi a le Minisita i tulaga i fanua ia ua taua e le Afioga i le Sui. Ia po o silafia e lau Afioga, ia o le anavatau lava a lenei foi Vaega Faaupufai ina ua tulai mai, ina ia aveatu fanua o tuafale o Nuu ma Alalafaga e toe lisi ai ia Nuu foi ma Alalafaga ua uma ona iai fanua ia. Ia, o lea la ua amata atu i Vaitele ua uma ona faatino, Saina ua uma ona faatino, Toamua faapena foi ona faatino, o Faleasiu lea ua oo atu iai le faasologa o le a faatino foi lea tulaga o lo o galulue ai nei le Matagaluega. Ia o Fasitoo ua uma ona vaevae ua uma ona tuu atu. Ia ona tatou oo atu laia i Nofolii, ia e saolele lava le Saunoaga a le Afioga i le alii Faipule. Ia mo lou silafia o lo o iai se isi o lo o lisi ai i totonu o fanua nei, fanua ia o lo o i uta o Nofolii. E iai foi le agaga o le Matagaluega ia ua lava se 30 acre e lisi ai le o lo o lisi ai le taimi lenei ae aumai acre e 150 e vaevae mo le Afioga ina ia mafai ona oo atu iai le faasologa i le tulaga lea. Ona e toatasi le o lo o lisi ai i ia fanua ia ae ova atu ma le 100 acre o lo o lisi ai. Ae o le agaga lava o le Matagaluega ina ia faasoaso ia fanua nei ina ia mafai ona tuuina atu ia ni lisi foi i lalo o aiaiga masani pei ona iai ia isi Alalafaga ua uma ona faatinoina. Ia ona tuu atu laia i Alii ma Faipule foi o le Afioga e aumai e latou le lisi e ave i le Pulega o Eleele poo le SLC ina ia mafai ona vaevaeina ai tulaga ia ma fai loa aiaiga po o lease agreement ina ia mafai ona faatino ai. Ae malo le onosai, saolele lava le saunoaga ia lea ua lua tausaga le talosaga mai ia ae o lea o le a faatinoina pe a uma le tatou fonotaga lenei ia ona faatino ai laia o lea fuafuaga. Ae aua e te popole o lea ua oo atu lava le faasologa i lau Afioga aemaise foi o le Itumalo.

FOFOGA FETALAI: Tulai mai lau Afioga i le sui usufono mamalu e faaaau le saunoaga.

Afioga AGASEATA VALELIO TANUVASA PETO: E momoli atu le agaga o le faafetai tele i lau Afioga i le Minisita, faafetai le tali manao faafetai le tali talosaga. Ia, le faafofoga mai a lo tatou Nuu i Nofolii ia o lea ua talimanino le Afioga i le Minisita e fitoitonu iai fanua o le Malo, ia

fesoasoani i lo tatou le tagolima e ala i fanua ina ua mae'a saunoaga, faafetai tele.

Lau Afioga i le Minisita o Galuega ia e faapena foi se lagona e ui lava ina matauina e leai se tupe faagaga faatatauina mo a tatou aualagalue. Ia ae tuu atu pea le talosaga i lau Afioga, pei lava ona tatou asia ia le vaega pei ona moomia, ia e toe tatalo atu ai i lau faasoala Afioga i le Minisita.

Tofa Hon Olo Fiti Afoa Vaai: Lau Afioga.

FOFOGA FETALAI: Ia malie le Sui mamalu sei tuu atu le avanoa i le Afioga Minisita o Galuega Tetele, lau Afioga i le Minisita.

Tofa Hon Olo Fiti Afoa Vaai: Ia, faafetai atu i lau Afioga i le Fofoga Fetalai, faafetai atu foi i le Afioga i le alii Faipule poo le alii Sui Minisita. E taua lava le tulaga lea ua agai mai ai lana saunoaga i mea o aualagalue pei ona silafia foi e lenei Maota ia ua tele lava ina agai atu ia atinae na ia tatou Poloketi. Ae e le o..... pei ona taua e le Afioga i le Sui Minisita ia le tulaga foi lea o le faigapaaga ma le LTA, malo faafetai i le finagalo faaalua. Ae mo le silafia e lau Afioga ma le mamalu o le Maota e le o taofia lava le talosaga mai ma le agai mai o tatou Itumalo i se fesoasoani a le tatou LTA i le tulaga o le faiga o le tau, o le tau o le auala e fesoasoani atu ai. Ia ma le tulaga foi lea o le inisinia i le inisiniaina o auala e fua i le palapala, sei tulou le Maota, o lo o i Afioga ma Itumalo, ia o lo o iai lava le fesoasoani lena a le tatou LTA. Molimauina o le tele lava o Itumalo lea ua amata a latou aualagalue ia latou Poloketi, ia ma o lea foi e iai lava le fesoasoani a le tatou LTA i tulaga ia e pei ona taua. Nei tei ua faapea e le o anoano atu ia le Pulega i se fesoasoani, o lea lava e tatala le avanoa ia tatou Itumalo afai e fiamaua se fesoasoani ia e faapena lava ona fesoasoani atu le Pulega ma le faaaloalo, faafetai.

FOFOGA FETALAI: Malo faafetai, ia sei tulai mai le Sui mamalu e faaauau le Saunoaga.

Afioga AGASEATA VALELIO TANUVASA PETO: Le agaga o le faaaloalo, faafetai tele i lau Afioga i le alii Minisita e tusa ai foi ma le tatalo atu i ia vaega. Ia o lea ua maua ia faafetai o lo o iai le auunaga, tatou galuega soosootauau, ia faafetai.

Lau Afioga i le Minisita o le Siosiomaga, tasi lenei vaega e seta'italiga foi le matou tuitui atu. E ui foi ina o matou mautinoa e utiuti lau faasoala mo le faamoemoe mo taligalu i Afioga ma Nuu taitasi ia ae faapena foi ona tuutuu atu pea. Lau Afioga i le Minisita, ia le pitonuu a lea o Vaialua, ia ua manino foi le Maota e le tau faamatalatalaina atu o vaega ua aafia. Ae faatepa lau Afioga i le Minisita, e le toe atoa se 100 pe 80 mita o le vaega o lo o totoe,

ia o lo o faapena foi ona faatino e nai isi Aiga o lo o iai tagolima i le tamoaiaga e mafai ai ona faatino. A o nai Aiga lava ia, ua e silafia foi ma e matauina le agai atu ia silafia lava le vaega ua faapena ona oo iai ia lea pitonuu o si o matou Nuu i Vaialua. O le tatalo i lau Afioga, ia se taimi ia faapena ona iai lau fuafuaga mo lenei pitonuu.

Ia, ona i ai lea o se manatu se i ou oo mai i le matou Itumalo, ia o le agaga o le faafetai, le paia o le tatou Itumalo. Aua le susu Tanuvasa o le Laau na fausia o Oe lava na itulua ai Aana ma toe atoatoa ai upu o le Itumalo, afio foi le Aiga Satuala o le Aiga faalagilagi, afio foi le Taimalieutu o le fofoga Satuala ma le falefa o le ailaoa, afio foi oe Muagututia o le Tama Satuala maliu mai oe le Faleaana o le Faletuiaana.

E faapea foi le afio o le Afioga a Tuiaana ma ou Tafa'i, afio Sooaemalelagi ma Alo Tamalelagi ma i laua na faigā, maliu mai lau Fetalai Alipia o le Matuanatogi o le Avaganofoa ma le mamalu i le Toaiva. O upu lava ia te oe Leulumoega, se o oe lava o le Tumua na tofi, o le Tumua fetalai, aea le pitonuu ia Vaialua afio Tauti ma Malaitai maliu mai oe le Faleaana i gaga'e, malo faafetai le tapuai. Faafetai i lo outou tui mai o le mulipapaga a o matou alofaiva e soalaupule le tamoaiaga o lo tatou Atunuu.

E faapea foi ona oo atu se agaga o le faafetai tele i Afioga i Ositaulaga, Afioga ia Patele Faauli, Afioga ia Patele Jerry ma lau Afioga Patele Leaena Aina, ae a Susuga i le Tiakono ma lou Faletua aemaise Susuga i Faafeagaiga ma outou Faletua o lo tatou Itumalo. Nai ou matua faaleagaga, lau Susuga i le Tiakono Isitolo ma le Faletua ia Camilla, faafetai tele i lo outou tapuaiga mau ma lo outou tapuaiga mamana ua mafai ai ona iu manuia ia taumafaiga a si o tatou Malo aemaise foi lo matou nofonofo atu. Faafetai tele i lau Afioga i le Tamaitai Palemia mo lou sao mo le atinaeina o le atunuu, faafetai i lau Afioga i le Fofoga Fetalai mo le faafoeina o le tatou Fonotaga. Faafetai foi i Ulu o Matagaluega o Faauluuluga o Faalapotopotoga Tumaoti lau Afioga i le Loia Sili ma le Ofisa tainane le Ofisa o le Fono lau Afioga i le Failautusi, faafetai tele manuia lenei aso.

FOFOGA FETALAI: Malo saunoa i lau Afioga i le Sui Usufono mamalu mai Aana Alofi Nu 3 po o lau Afioga foi i le Minisita Lagolago o le Matagaluega o Aoga Taaloga ma Aganuu malo faafetai mo le feau taumolimoli aemaise foi manaoga o le Itumalo ia ma le fesoasoani foi i le tatou Tala o le Tupe malo faafetai.

Ia o le avanoa lenei i se tasi o Sui o le tatou Komiti
Ia tulai mai le sui o Faasaleleaga Nu 2 lau Afioga i le Minisita Lagolago o le Matagaluega o Tupe.

Afioga MAGELE SEKATI FIAUI (Faasaleleaga 2): Ia lau Afioga i le Fofoga Fetalai sa autilotilo lava ma vaavaai foi i sui matutua o si o matou

Komiti e ave i ai le faaaloalo ma le faamua ae faafetai o lea ua maua se avanoa.

Ou te tulai ma le loto maualalo ma le migao tele e talisapaia le avanoa ua maua e fai ai se tala puupuu a lenei Itumalo i le Tulafono Tau Faaofi o le Faatatauina o Tupe 2023/2024.

Lau Afioga i le Fofoga Fetalai ou te taofi o lea ua taoto upu o le taeao ma le aso aua galuega faasolosolo a le Palemene, o lea foi ua uma ona e fana le ũ i le vateatea ma e seu i falemua i le taeao ua sola e faafetaia le alofa ma le agalelei o le Atua. E momoli atu le agaga o le faafetai tele. Ua manaia foi a i le matau nisi o suiga ua i ai nisi o protocols masani e amata ai a tatou Fonotaga. O lea lava ua faatino upu e muamua mea i Matautu Sa. Faafetai. Ioe lau afioga e muamua lava le Pule a le Atua i so o se mea. O lea ua o gatasi le futia ma le umele e muamua lava ona faafetaia le Faavae Papa o Samoa ae le gata i lea ae o le tapaina o lana pule faasoaso mai aua o tatou faiva ma tiute, ma o le alafua lea ou te talitonu e manuia ai tatou faatinoga.

O le mea lea e momoli atu ai le faamalo le tofa i lau afioga. E le selu atu, e le gata o lau Susuga o le Aoao Fesoasoani ae leaga e faigata o oe na taliaina le Talalelei ua ao ai Samoa aua le taeao nai Mataniu Feagaimaleata faafetai tele i lau Afioga.

Lau Afioga i le Fofoga Fetalai e toatele a e valaaulia ae toaitiiti e filifilia. O sui mamalu o lenei Palemene ia o tatou lava o fanau faapelepele o le Tamā Fa’alelagi ua filifilia mai i le toatele o le tatou atunuu e fai ma ositaulaga aua nai o tatou Itumalo. Lau Afioga i le Fofoga Fetalai o Faaseleleaga o le aiga. Ou te matau o lea ua soliata le la ma ua faaifoifo foi i le itu e gase i ai lana taamilosaga. Ona manatu lea o le a ta seelua i lou sa folau i le taeao ua sola, i lau faatalofa ma lau faatulima aua le paia ma le mamalu o lenei Palemene.

Lau Afioga i le Fofoga i le Fetalai e taua ia te au fautuaga a tamā o si ou Itumalo sa fautua mai, “Magele aua le ta i tua le lauga ae lauga i le point”. Ia o lea lau Afioga, ua ou manatu ou te le toe fagota sagolegoleina le ato ponapona a le atunuu i ona paia apoapo gata mai lava i ona ao seia paia ona iu, ou te taofi o lea ua maea ona paelago ma paepaeulufanua i saunoaga ma fetalaiiga a Tulatoa ma Ponaoo o le atunuu, aua le tapuaiga mamalu a Samoa. Ae manatu o le a fana tonu ia le malama ma vili tonu le ifi a Maina ma sui tonu le mata o le niu aua se sao o si ou Itumalo.

Ia ae le i alulua se faamatalaga e tau lava ina ou pai atu i si ou Itumalo Faapalota Faasaleleaga 2, po o le Itumalo Faaalalafaga o Iva i le Faasaleleaga e afua atu i Malaeloa seia paia Maota ma Fogatafua ia tapuai maia ma le manuia.

Lau Afioga i le Fofoga Fetalai, o se minute o lumanai ona taumafai atu lea o se leo po o se sao foi i le \$1.08 piliona ua faatatauina mo le tamaoia o si o tatou atunuu.

Ae o le a tamua atu se lagona i le faalavelave na tulai mai i le Atua Faasaleleaga i nai vaiaso ua tuanai atu. Ia sa matau foi i saunoaga i le Maota

e pei o le 3,4,5 lea sa taua lava o Faasaleleaga 3,4,5 taua na aafia. Lau Afioga i le Fofoga Fetalai e fia faailoa foi o lea sa iai se aafia o se vaega o si ou Itumalo i si o matou nuu lea o Safua ma e tele aiga foi sa aafia i lea faalavelave. I le matau o se taimi muamua lea ua tulai mai ai se faalavelave faapenei i lea itu o le motu, ma sa faaleagaina ma tafefea nisi o meaafale ma meatotino e oo lava i taavale. Ma e oomai i le taimi nei oloo tau faamama pea le palapala, tulou, ma otaota ua to'a i totonu o maota ma laoa i nisi o fanua. O nisi o aiga ua faaleagaina pa oloo puipui ai fanua ma fale aemaise foi pa oloo puipui ai taumafa toto'a ma le tele o nei taumafa ua faatamaia uma e le ma'ema'e o lenei mala faalenatura.

Ia ma e faaopopo atu i talosaga ua oo atu i le Malo sei manatua ane si o matou nuu i la outou faasoa i fesoasoani e tuusao atu mo nai aiga sa aafia i lea mala faalenatura.

Lau Afioga i le Fofoga Fetalai e tauala atu se vaivaiga i lau Afioga i le Minisita o Siosiomaga, sei toe silasila ane lava i faamaumauga a lau Matagaluega poo iai se talosaga o si matou nuu lea o Safua mo le toe faia lea o le taligalu lea e i tua tonu o si o matou nuu le alia lea e tuaoi ai matou ma le afioaga o le Fofoga Fetalai lea sa tupu ai ma tulai ai lenei faalavelave. Na logoina a'u o le tausaga 2016, 2017, 2018 o le vaitau lena na tuuina atu ai le talosaga ia pe le ua tatau ona toe asia lea vaega o si o matou nuu ma toe silasila iai i se faatinoga. O nisi o ala lapopoa tulou, sa i tua o le alia ua vane uma i luga e le tafe tocititi lava a afaina ai nisi o fale o aiga.

Ia ou te fia faaopopo atu foi i lea tulaga, lau Afioga i le Fofoga Fetalai o le auala o si o matou nuu ua matuai faaleagaina e le vai, e faai atu ai i ina se talosaga mo le Minisita o Galuega Tetele pe a lava lau faasoa o le a sina vaega e totoe mai i le faaleleia o auala tetele (main roads) mo Lano ma Saipipi lea ua ave iai le faamuamua leaga e toatele le tatou atunuu e femalaga ai, ia a totoe sina vaega sei alofa ane i le auala o si o matou nuu sa faaleagaina i le matautia o lenei faalavelave na tulai mai.

Lau Afioga i le Fofoga Fetalai e faafetai lava i le agalelei o le Atua e leai se soifua na fano peitai o le mau a nisi na aafia, ana tupu lenei faalavelave i le po e iai tagata e tafefea ma fano le soifua.

Ia lau Afioga i le Fofoga Fetalai o sina manatu puupuu i le Tala Faatatau Autu o le Tupe 2023/2024, e muai ona faaleo foi le agaga o le faafetai i le Minisita o Tupe ia poo si a'u Minisita mo le onosaia o lenei galuega tele le faigofie aemaise o le tofa liuliu ina ia lelei le faasoasoina o le tamaoiga o le tatou atunuu. E fia faafetai foi i le Afioga i le tamaitai Ofisa Sili o Pulega lau Afioga Saulaititi Ofisa Lagolago ma le mamalu o le Matagaluega o e uma sa tofu sao i le tuufaatasia aemaise la outou tuualalo i le Minisita ma le Malo, malo faafetai, sa matauina lo outou le moe lelei i le po aua le taumafaiga o lenei galuega tetele, ia saga faamanuia le Atua ia outou Afioga.

Ia lau Afioga i le Fofoga Fetalai e tau faaeteete foi lava e toe oo se tala i le piliona ua tele saunoaga ua luga lalo ai le Maota i lea tulaga, ae e iai le

manatu e lei fausia Roma i se aso se tasi o se galuega sa fauao faupo taumatimati ma tau faasoaso le tamaoaiga o si o tatou atunuu. Ma e iai foi le lagona o le faatupuina o tupe faatatauina o le faateleina lea o galuega faatino, ma o le siitia o galuega faatino ma tulaga faapena, e faatupulaia ai foi tupe maua ma tulaga faapena i se tamaoaiga o se atunuu. Na iai lea o lo'u lagona o le ausia o le Tupe Faatatauina ua iai le tasi piliona o se maa maila ua tataua ona tatou faafetaia ma patipatia le Tamaoaiga o si o tatou atunuu, o se moemoe fou ua totogo aua Tala o le Tupe o le a faasolo mai i le lumanai o le tamaoaiga o si o tatou atunuu.

Ia o le agaga o lenei Itumalo lau Afioga i le Fofoga Fetalai poo le a le tausaga o le a foi le Faigamalo o tatou lava e tasi e le mala ese iinei mala ese iina, ae soia tatou te fetuiai ma feteenai o tatou manatu ma lagona o lo o faafogafoga ma tapuai le atunuu e ona le Pule na tatou omai ai i le Maota lenei e lufilufi lona tamaoaiga.

Ia lau Afioga i le Fofoga Fetalai i le matau lava i lenei Tala o le Tupe ua tatou ausia ma talanoaina e iai a le lagona e faafetai i le sao o le tatou atunuu le au totogi lafoga o le tatou atunuu ma lo latou sao i le tamaoaiga o le tatou atunuu ma lenei matatia ua mafai ona tatou ausia. O le upu e masani ai le atunuu, o le tatou "vaa e fautele". Faafetai tele atu mo lo outou sao taua.

E i ai foi le lagona lau Afioga i le Fofoga Fetalai, e faafetaia le sao o nai o tatou aiga, o uo ma Samoa o lo o alaala ma papaaao i na atunuu e mamao i tupe lafo mai (remittances) e fesoaoani i lo tatou atunuu. O le latou sao lea, o lea ua ausia tulaga e pei ona tatou talanoaina ai se isi laasaga fou. E momoli atu le agaga faafetai ma le faamalo i lo outou sao taua.

O nai vaega taua ua matauina o lea foi ua saunoa nisi... o le Cost of Living Adjustment lea ua i ai le siitaga o totogi, malo faafetai e fesoasoani i nai o tatou tagata e cope ai aua lenei vaitau ua tatou i ai, tasi lea fesoasoaniga aua le taugata o le soifuaga. E \$51 miliona lea foi ua faaagaaga aua itumalo. Ou te manatu, tasi lea vaega taua e fesoasoani foi i le tatou atunuu aemaise o atinae.

Lau Afioga i le Fofoga Fetalai, e i ai lava nai vaega itiiti ia e fia pai lava i ai. Lau Afioga i le Minisita o Pisinisi, Alamanuia ma Leipa, ou te matauina e i ai nisi o oloa foi o lea ua aveese, masalo ua faasa foi, lea e i ai le warning foi lea i le tulaga o le cancer, le aafiaga o le cancer, lea sa i ai nisi o taumafa faapea ua faasa. E momoli atu le agaga o le faafetai i lea tulaga. Ae ou te matau lava o lo o i ai lava nisi oloa e ese mai taumafa ma o lea lava e faatauina pea i totonu o le tatou atunuu, lea e i ai le warning lea o aafiaga o le cancer. Na ona faafesili foi lele i le Afioga i le Minisita po o le a foi lea Tulafono i le faaulufale mai o oloa nei i totonu o le tatou atunuu lea e i ai tulaga nei o le aafiaga o le cancer, ona e i ai nai oloa foi sa faatau, ae le o mafai ona faaaogaina i le taimi lenei, ona o le popolega lena o lo o i ai le warning lena.

O le isi vaega foi lele i le tualga lava lea, e faa-Igilisi le warning lea, ae ta te manatu i le lautele o le tatou atunuu, pe le mafai ona faa-Samoa le warning lea ina ia mafai ona manino ai... pe a mafafau i le right foi lea a le consumer e filifili ai pe faatau pe leai, e faapena se vaivaiga i nisi o oloa nei. Ae mafai ona musumusu atu i tua ma faailoa atu nisi o oloa nei mo le silafia, o lea e matau e faatau i totonu o le tatou atunuu. O le tautaualemau atu lea i le Afioga i le Minisita ona o le tulaga lava o le puipuiga i le soifua manuia o le tatou atunuu.

Ona oo mai lea lau Afioga i le Fofoga Fetalai i se tasi lenei o oloa foi ua matauina. O le tulaga lea i le vaping lau Afioga i le Fofoga Fetalai. E le o le vaping a o le vaping – v a p i n g. Po o le e-cigarette, e tau e nisi o le electronic cigarette. Ua matauina o lea ua ofi mai totonu o le tatou atunuu lea foi oloa. E consider i lalo o le category lea o le sikareti lau Afioga i le Fofoga Fetalai. Ma ua i ai saunoaga foi ua aumai e le WHO i aafiaga o le soifua maloloina ona o lea foi oloa. O lea foi ou te tau matau ua i ai foi talanoaga i le Ofisa o le Soifua Maloloina i le tulaga lea ona o le aafiaga ma le fautuaga ma le lapataiga o le aafiaga o alo ma fanau i le chemical lea o le nicotine lea e i totonu o le oloa lenei. Ma e ou te taofi o lea ua aware foi i ai le Matagaluega o le Soifua Maloloina. Na faailoa foi se atugaluga a le Cancer Society o le tatou atunuu i le mataupu lea ma le faatauina o le tulaga lea, e le soifua maloloina mo le tatou atunuu.

Ia, ou te manatu e fai ia au ma sui o e le taumafa i ia mea e faaleo se vaivaiga i lea tulaga, se i silasila ane i lea oloa pe o se tulaga e tataua ona faataga i totonu o le tatou atunuu. O le isi aafiaga o le tulaga lea lau Afioga i le Fofoga Fetalai, ua oo i totonu o aoga i tamaiti aoga ua maua ai le tulaga lea, le product lea, le vape lea ma pei se paipa foi lea e ulaula ai. O nisi o tamaiti e le ulaula ae ua ulaula ona o le mea lea. Ae pei lava ona ou tau faailoa atu, e tele lona aafiaga i le soifua maloloina o tatou tagata. Ia, o le tuualalo lea i Afioga i le Minisita e tauala atu i lau Afioga i le Fofoga Fetalai.

Ua faafogafoga foi le Minisita o Aoga i lea lava tulaga ina ia faamalositia le Tulafono e tapu ai nei tulaga faapea i totonu o aoga.

Ia lau Afioga i le Fofoga Fetalai e le faaitiitia le agaga faafetai i le Afioga foi i le Minisita o Faatoaga ma Faiga Faiva i le faamaite lea i tulaga o Uluai Seleselega. O le matau a lenei itumalo, o se tasi lea o auala e fesoasoani i le taugata o le soifuaga, aemaise le tulaga i le tatou o ese mai le ola faalagolago, ae ia tatou ola tutoatasi, o le tatou o e taumafai e galulue. Ia o se tasi lava o aoga faavae na afua mai le foafoaga o lenei lalolagi ina ia mafai ona tatou tutoatasi ma tatou galulue. E avatu ai le faafetai i lau Afioga.

Pau lava le talosaga mo lenei Tala Faatatau Autu o le Tupe i le \$10,000 lea e aumai i itumalo, e pei e manaia ae aumai uma le tupe e fai ai le faasoaa a le itumalo i mea foi e manaomia aua le tulaga o faatoaga ma lafumanu ma faigafaiva.

Ia, lau Afioga i le Fofoga Fetalai e faaopoopo lava foi i se lagona i le Afioga i le Minisita o Fesootaiga i le tulaga lava lea o le quality of service. Se i toe tagai ane lava i ai lau Afioga i tulaga uma nei ina ia mafai ona faaleleia atili nisi o nai vaega nei aua le lautele o le tatou atunuu. E matauina foi lava i le fealualuai i le taulaga i nisi o taimi, e faapena, e talanoa talanoa lava motu le telefoni pe... ae se i toe silasila ane i ai lau Afioga.

Lau Afioga i le Fofoga Fetalai, ua lamalama faaii foi se leo o lenei itumalo, e le tele lava. Ae o le agaga faamalosi mo le tatou Palemene i lau Afioga ma le mamalu o le Palemene, ia, o le saunoaga a Paulo, afai e gata i le olaga lenei mea tatou te faamoemoe i ai, ua sili lo tatou malaia.

Lau Afioga i le...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai pe maua se avanoa...

FOFOGA FETALAI: O le a se mea o faafinagaloina?

Afioga Sulamanaia Fetaiai Tauilili Tuivasa: Ioe pei o lea na ou faalogologo lava ma le totoa e ava tele le sui usufono lenei i le sui usufono o lo o saunoa nei ona o le sui usufono foi e mataala. Ua ou te'i i lou tago atu i lau telefoni o lea ua text mai si ou itumalo i foliga o le paipa lea e taua e le sui usufono e pei ua faapopoleina ai le tulaga lea i le sikareti lea. Pe mafai ona e fou foi le faalogologo a lenei itumalo, ae faafetai lava i le faamaite a le Afioga i le Minisita Lagolago o Tupe, ona e le o iloa e matou le isi ituaiga sikareti lea. E pei e faapena se lagona, ina ia mafai ona faalauiloa mai, ae pe faapefea foi ona aumai i totonu, ae le o i ai se faatagaga i le tatou atunuu. Ia maitaulia e i ai le tatou fale sikareti lea e i ai nei, ia pei na pau lena o le sikareti lea e i ai ma sikareti masani foi lea... Ae pei la e fou lea mea ua ta faalogologo atu ai, ina ne i te i ua... leaga o lea e popole mai le atunuu aemaise o lea e faaoga e tamaiti aoga, po o a foliga o le tulaga i lea ituaiga sikareti fou ua oo mai totonu, aemaise foi la o oloa lea e maua ai le cancer.

Ua popole lava lenei itumalo ma lenei sui usufono ona a faapea ua i ai ni oloa faapea, ia o le Minisita lenei o le MCIL o le Minisita mataala, ia sa tatau ona faalauiloa i le atunuu, o a oloa lea o le a ban ia ona faapea lea ona... ae o lea e popole ne i te i ua aafia atu ai i le faamai o le cancer ona e le o faalauiloaina oloa ia. Na pau lava oloa ia e matau e le matou itumalo, o oloa foi nei ua expire, ae le mafai ona toe tuu e faioloa i luga o latou fata. A o oloa la ia faapea e maua ai le cancer, ia pe mafai ona tau faalauiloa laitiiti lava.

Ia ma lou agaga...

FOFOGA FETALAI: Ia o lea ua maua atu, e taua foi le faauilavea, e lelei foi le faamanino lelei mai e lau Afioga i le sui usufono mamalu po o a ia mea.

Ia se i tulai mai lau Afioga i le Minisita o Pisinisi ma Alamanuia.

Tofa Hon Leatinuu Wayne Soialo: Ia, faafetai lava i le... sa tuu lava se i tali atu i le taimi e fai ai le aotelega ae tuu pea le lauga a le sui usufono, ae ona o lea ua fesiligia foi e le sui usufono mai Vaimauga. O le taua o oloa nei o lo o i ai le faalauiloa ia, e tai pei lava o le sikareti foi lau Afioga. E te vaai i ai o lo o iai lava le warning, le sign lena e i ina, e tuu atu i le tagata o lo o mafai ona faaaogaina ia oloa i lana fuafuaga pe tago e faaaoga pe leai. O le mea foi la lena o lea e te vaai ai i sikareti o i ai foi tulaga faapena, e sau ai la le warning lena e aafia ai lou soifua maloloina pe a e faaaogaina. E faapena foi la i apa ia e taua, o lo o tau mai ai foi i ina, e mafai ona faaaoga for consumption ae i luga lava o la oe filifiliga. A faapea ua mafai ona aumai i totonu o Samoa, o lona uiga, o lea ua uma ona faatino i ai le galuega a le Ofisa o Tiute mo le aumaiga i totonu o Samoa ona talia ai lea, vagana ua fai se tatou Tulafono faapitoa e faasa ai la ituaiga oloa nei, ia ona mafai foi lea ona faalauiloa atu e le Matagaluega ia aua ne i toe aumaia i totonu pe faasaina.

A o le taimi lenei, e fou foi lau faalogo i le mea lea o le vaping po o le vape. O i latou ia o lo o faaaogaina, ou te le iloa po ua aumai i totonu o Samoa pe leai, ae tele lava o lea ou te vaai e omai lava ma latou mai fafo, ia ma faaaoga. Ou te talitonu e le o mafai ona aumai totonu o Samoa ma faatau i totonu o Samoa, ona o le tulaga lena, e pei lava foi o se isi sikareti le faaaogaina o le tulaga lea.

Ae pei o le tali atu lea, ae faafetai lava mo le faafesili foi ua e toe aumaia, ae le gata i lea o le finagalo foi o le sui usufono o lo o lauga nei.

FOFOGA FETALAI: Ia se i tulai mai le Afioga i le sui usufono mamalu e faalautele mai.

Afioga MAGELE SEKATI FIAUI: Faafetai i lau Afioga i le Fofoga Fetalai. Faafetai foi i le Afioga i le sui usufono mo le faauilavea. O le mea lea ou te fiasia ai, e alofa lava ia te au ma aumai foi le fautuaga.

O le tulaga lea i le product lea o le vape lea sa ou taua lau Afioga i le Fofoga Fetalai, ia pei lava ona ou fai atu, leaga ou te le auai i ia mea, a. Ou te le o sau la ma se... i le taimi nei, ae tai pei lava o se paipa foi lele lea e ula ai isi mea ou te le iloa lau Afioga i le Fofoga Fetalai. Ae pei e tai faapena foliga o le mea, masalo foi ai ua silasila i ai le Afioga i le sui usufono, ae, ia... o lea ua maua, o lea ua i ai i totonu o le atunuu lea tulaga. Ia e silasila atu foi i Niu Sila, o la e foi ua fau faapitoa lava le Tulafono a Niu Sila e puipui ai ona tagata mai lea foi product, pei foi ona taua e le Afioga i le Minisita...

Ae lau Afioga i le Fofoga Fetalai, o le...

FOFOGA FETALAI: Ia se i tuu atu i le Minisita o Tiute pe maua mai se fesoasoan. Lau Afioga i le Sui Palemia.

Afioga Hon Tuala Tevaga Iosefo Ponifasio (Minisita o Tupe Maua): Faafetai mo le avanoa. E faatalofa atu foi i lau Afioga i le Fofoga Fetalai, atonu foi ua leva aso e leai se leo o lenei sui usufono. Ae ua ou tulai atu ma le faaaloalo ona o lea ua talanoaina le... e tau lava o le sikareti ae le o se sikareti, o le vaping, ia tusa o se device foi lele o lo o i ai le asu, e tusa lea o se alternative mo i latou o lo o taumafai e le agai i le tapaa ae pei ua latou faaogaina le device lea po o le laau lea o lo o mafai ona puna mai ai le asu, pei foi lele o se alofaga mai le tapaa. Ae ua alu alu lava, e pei ua i ai lava isi ua taumafa i le device lea o le vaping, ua pei lava o le tapaa moi.

O le isi tulaga o le oo mai o le vaping iinei i Samoa, ia oute faasaoa le Afioga i le Minisita Lagolago, ua ou vaai foi i ai iinei, ae pei ona silafia e le Maota, e le o i ai se tatou Tulafono foi lea e taofia ai, ia pe regulate ai foi le faatonutonu o le tulaga o le i ai o le vaping po o le device lea i totonu o Samoa.

O tulaga e faapea o lea e maua ai le cancer, ia o se mea foi na ou faitau ai i nisi foi o speculations po o nisi foi o mafaufauga foi ia o matematega lava, ae le o i ai ni proof po o ni faamaumauga po o ni faamaoniga faasaienitisi e faapea mai ai, o lo o aafia tagata o lo o taumafaina po o faatinoa le tulaga lea o le vaping i se cancer. O le faaopopo atu lea lau Afioga, ae ou te masalo o se taimi ona avatu auiliili foi lea o se tulaga o lo o i ai le mataupu lea pe a maua sou avanoa. Ae mo le taimi nei, e le o i ai se taofiga a le tiute ona e le o se oloa foi lea faasaina e faapea na aumai, e pei lava o le sikareti. Ma le faaaloalo lava lau Afioga.

FOFOGA FETALAI: Malo faafetai i lau Afioga i le Sui Palemia ma... Ia, se i tulai mai le sui usufono mamalu o lea toe tasi minute lou taimi.

Afioga MAGELE SEKATI FIAUI: Faafetai i lau Afioga i le Fofoga Fetalai, faafetai foi i lau Afioga i le Sui Palemia mo le faamalamalamaina atili o lea foi mataupu., Ae na o le faamaninoina lava o le mataupu na avatu, o products foi ia e ese mai, lea e i ai le warning foi lele mo le aafiaga o le cancer, e ese mai la le tulaga lea o le vape. O le vape o le statement mai le WHO o lo o i ai le warning foi lele ona o le nicotine ona o le aafiaga o le soifua maloloina o tatou tagata lautele. Ae manatu o se taimi i le lumanai ona faamanino atili lea o ia foi tulaga. Ae o le puipuiga lava ma le manatunatu i aafiaga ona ua oo i totonu o aoga ma talanoaina ai foi tulaga faapenei.

Lau Afioga i le Fofoga Fetalai e pei ona taua i se taimi ua sola, ona o lea e i ai nai vaega ia o oloa lea e i ai aafiaga, le warning lea o le cancer, o lea e i i ia te au, o se taimi ona faaali atu lea i le Afioga foi i le Minisita po o se tulaga e ono faapopoleina ai le tatou atunuu i ia tulaga pe leai foi. Ae ua maea atu ai ma se lagona foi ma se vaivaiga o lenei foi usugafono e tusa ai ma le avanoa.

Lau Afioga i le Fofoga Fetalai, ia faamanuia le Atua i lau Afioga aua foi tiute ma faiva i faagasologa o totoe o lenei foi galuega o tatou feagai ai. O le tatalo lava a lenei itumalo, ia tatou filifili faatasi ma le Atua e manuia ai mea uma tatou te faia.

Ia, lau Afioga i le Fofoga Fetalai, ia saga faamanuia atu le Atua i lau Afioga i tiute ma faiva, faamanuia le Atua i le Afioga i le Tamaitai Palemia, Sui Palemia ma le Kapeneta aemaise foi o le Afioga i le Taitai o le Itu Agai ma sui usufono mamalu uma o le Palemene ae ou ola i le alofa o le Atua. Soifua ma ia manuia.

FOFOGA FETALAI: Malo saunoa i lau Afioga i le sui usufono mamalu mai Faasaleleaga 2, ia po o lau Afioga foi i le Minisita Lagolago o le tatou Matagaluega o Tupe, ia malo lava saunoa. Ia manatua ane lau lisi o oloa na e afaina e tuuina ifo i le sui usufono o Vaimauga 1, leaga o lea ua popole lona itumalo, ma tuuina mai foi i le Sui Palemia, ia e aoga foi sina faamalamalamaga aua le silafia e le atunuu mo le agai i luma. Ae malo lava faafetai.

Ia o le avanoa lenei o se tasi o sui usufono o le Komiti. Ia, tulai mai lau Afioga i le sui usufono mo Safata 2 lau Afioga i le Minisita Lagolago.

Afioga LAUMATIAMANU RINGO M. PURCELL (Safata 2): Ia ou te muai faatalofa i lau Afioga i le Fofoga Fetalai, e faatalofa foi i le Afioga i le Tamaitai Palemia, le mamalu o le Kapeneta aemaise o le Afioga foi i le Taitai o le Itu Agai, faapea foi le mamalu o le nofo a Minisita Lagolago, ia ma le mamalu o lenei Palemene.

E faatalofa atu foi i Ofisa Sili o Pulega o Matagaluega eseese a le Malo ae faapea foi Vaega Tumaoti. E faatalofa atu i lenei itula o le aso.

E talitonu ua e muai ave le faasagi i le Atua i lenei taeao. E i ai le talitonuga o lenei sui usufono, ia tatou folau ia i lou sa e pei ona e saunoa i le taeao. E faapea foi ona faatalofa atu i si o tatou atunuu mai lava i mauga tetele seia oo i mauga iti, mai lava i le papa i Tau seia paia le papa i susu. Ia, e faatalofa atu i lenei itula o le aso.

Ou te faatalofa foi i si ou itumalo o Safata 2 mai lava i Niusuatialemanu seia paia Niualama. O le paia lava lea aua le Falefa o le Ulugatanifa e faapea foi le afio o le Faauluuluga, Tapaau na Tausi e le Alataua, faapea foi le fetalaiga i le Taulauniu ma le Aitu Tagata, le mamalu o le Alataua ae faapea

foi le nofo a Tula ia Safata. Ia tapuai mai se i fai se sao foi o le tatou itumalo aua le Tala o le Tupe 2023/2024.

Ia e manatu e faaeteete foi i le tulaga o le matou auai i le Komiti o Tupe. Ia o le a faapena foi ona molimoli atu na o ni nai fautuaga aemaise foi o ni manaoga o si ou itumalo.

Ia, o le a ou amata mai i le tulaga foi o le tatou aoaoga. E le po malae i le tulaga o i ai le tatou atunuu i so o se vaega lava ua i ai lava le tulaga i le sioki o faiaoga, sioki uma lava le toatele, e oo lava i loia, ia o inisinia foi, ua tatou maitauina le shortage i le taimi lenei. E i ai lou talitonuga o le tatou galuega fai toatele, mai lava i totonu o le Kapeneta ma tatou ua tofia e avea ma taitai o le Malo, o le tatou matafaioi lea, tatou te silasila i le lumanai. Aua o lea ua tatou molimauina, ua tele lava ina i ai le sioki o faiaoga, sioki leoleo, aemaise foi loia i le tulaga foi o le faatinoia o le tatou galuega. Ia o le tilotilo foi i ai i le lumanai, e faaaauu lava ona sioki. E tai pei la o loia, o lea ua fia tausaga ua 7 pe 8 tausaga e le o toe avea ni a tatou loia e aooga. Ia o le tatalo lena i le Kapeneta ma le tatou Malo, ia se i silasila i tulaga foi e toe faaatoatoa ai ia vaega.

E momoli le agaga faafetai i lau Afioga i le Minisita o Faatoaga. Malo le galulue, malo le faamatie i tulaga foi o tatou uluai seleselega. E i ai lava le talitonuga o lea na e saunoa i tulaga foi o Satunumafono i le aso ananafi, ou te iloa ua na o le isi pito o Safata 1, a o Safata 2 o lo o tele lava le meaaano, o lo o tele le meaai.

Ae pau lava le tatalo aua ou te tilotilo atu i le tatou Tala o le Tupe lau Afioga i le Minisita, e le o i ai se tupe o faaagaaga mo tulaga o tatou toganiu i le atinaega o tatou toganiu. I think o le isi backbone lea o le tatou tamaoaiga, ma o i foi o lo o faaoga i le fofoga taumafa, e pei lava ona talanoa atu foi i le taimi ua sola, na \$10 le tau o le niu, a o lea e tilotilo atu i le faasoasoaga, e le o i ai se seleni e faaagaaga mo le tatou niu mo le atinaega o le tatou atunuu.

Ia ona ou oo mai lea i le vaega lea o le Va i Fafu. O le tatou Treaty lea of Friendship ma Niu Sila, e matauina lava le tatou quota. Ou te iloa e uma lava le quota o lenei tausaga e le au i se \$1000 tagata e malaga i fafo i le tulaga lea o le tatou quota, ia po o faapaleni i se isi itu. O tatou RSE foi, e i ai lava le talitonuga a faapea e le mafai ona meet le quota lea, o le a le mea e le faaoga loa i ai le RSE e faaatoa ai le numera? Aua o lea lava e manaia le tauga lea o le Treaty of Friendship, a o le tele ia o tulaga o lo o faafaigata ai, e oo lava i tatou visa, ia e faafaigata foi.

Faafetai i le faatofalaiga a le Kapeneta i le tulaga foi o le seleni lea ua vavae mo i latou o le fanau e faaaauu ai e sikolasipi. Malo faafetai mo le faatofalaiga. Ae pei lava e tau a le Treaty lea of Friendship, ae ua tele atu ai lava ma nisi mea ua faaopoopo, e pei ua faafaigata ai ona ave ni outou alo ma ni a matou fanau i avanoa ia sikolasipi, on aua toe i ai foi isi suega e fai mulimuli e ese mai le maka ua ausia e fanau. Ia pei o le tatalo atu lea, e toe

silasila i le tatou Treaty lea i se mea e faamautu ai ma faafaigofie ai ni outou alo ma ni fanau e auina atu i sikolasipi.

E momoli le agaga faafetai i lau Afioga i le Komesina o Leoleo aemaise foi lau Afioga i le Minisita o Leoleo e tusa ai foi ma le galuega. E tele lava foi ina maua nisi o tagata solitulafono e ala i laau faasaina, ae pei lava o le tilotilo, e seasea maua ai se tagata foi lea e maualalo sona tulaga. Ae pei lava o tagata e lelei galuega ma tagata e i ai tupe, ia o lea lava e maua i nei solitulafono. Ia, ona e i ai foi lota ita malamalama, aua ou te iloa o le tele lava o le aisa lea ua i ai nei ua kuka i inei ia tatou. O lea lava ua matauina ia, e toatele lava latou o lea ua kuka, aemaise i latou sa nonofo i fafo, o lea ua oo mai i inei i le tatou atunuu. Ia se i silasila ifo i ai lau Afioga.

O le tulaga o le maua ai o tagata nei, o lo o maua ai foi ma fana. E le gata o fana a o le tetele o seleni e nonofo ma tagata nei, ona tatou iloa lea o le tamaoiga e i ai nei tagata. Ae ou te le iloa foi na ao foi le tatou fana talu ai, po o le last two years sa fai ai le amnesty foi lea. Ae pe le silasila lau Afioga, o lea tatou te aga i lea tausaga i tatou taligamalo, ia pe le toe faia se isi tatou amnesty e ao ai fana, e sili atu lena i lo le tupu ai o ni faalavelave a o tatou aga atu i tatou taligamalo.

O le isi mea lau Afioga i le Minisita o Leoleo, ia e malamalama lava le tulaga foi o lo o i ai tatou taifau sosogi. Ia pei lava na o drugs mea ia e sosogi e tatou taifau, a o lea e i ai le talitonuga e i ai le faaeteetega i le fonotaga i le lumanai. Ua iloa foi mea nei o tagata solitulafono e mamao le latou vaai, they plan ahead. O le tulaga lena, e tatau on ai ai se tatou taifau e sosogia mea nei o pomu, vaeatu le Fono. E tatau ona i ai se taifau foi lea e na te sosogia mea o explosions e fesoasoani foi i le galuega a tatou, ae faaopoopo la i ai ma le tatou scanner foi lea, o le lua galuega faitoalua ma le Afioga i le Sui Palemia ia o le agaga lena e soso atu ai i le tulaga foi o le galuega fuafua mo lea tausaga i le tatou fonotaga, aua e pei e mamafa lava o le security o i latou. Ia a o tatou aga atu foi la i lena tausaga i le tatou fonotaga, faafetai i le tele o galuega o feagai ma le Matagaluega. Ia se i silasila ifo, o lea ua tuu atu agai i tua i Matagaluega, ia insure o fale aemaise ai foi o tulaga i insure a nai leoleo. O lea ou te vaai atu i le Tala o le Tupe, e na o insure o fale, ae ou te le iloa po o fea na e insure ai le Matagaluega. I tutupu mai ni faalavelave, ae o lo o lava tapena lau afioga i tulaga ia.

Ma le mataupu mulimuli, ou te iloa ua fa i le lima tausaga o sola lava le pagota o Chong Nee, ou te le iloa po o toe manatua e lau afioga ma le Matagaluega, o lea lava e i tua ia Chong Nee. Ia se i silasila ifo i ai lau afioga i le Minisita.

O le Minisita o Tamaitai ma Agafesootai, e momoli le agaga faafetai i le tulaga foi o le toe talia o le fuataga o le ie Samoa. Ia malo le uta mamao i le tulaga foi e toe tapue ai ia vaega sa fiafia i ai tina. I tulaga foi, aemaise o tatou toga, o lo o alu atu lava i fafo, i faalavelave tutupu i fafo. O se vaega

taua e naunau i ai tina e faatino lo latou valaauina e ala i le toe faia o tatou fuataga ia o le ie Samoa, malo faafetai.

E fesoasoani atu foi ma valuvalusia aa o le fau i lou finagalo, aemaise lava o le komiti lea latou te iloiloina le tatou miliona. E matou te lagolagoina se taavale e faaaoga i Ofisa. O matou nei e i tua i Safata, a sau le tagata e fai le mataupu i Apia, e sau i le taxi toe alu i le taxi. E \$140 e sau ai le tagata mai tua ma toe alu atu. A uma lava la le vaiaso o sau i Apia, alu atu, ia o le ituaiga seleni lena e tilotilo i ai, ma o lea na iloa nei i tatou poloketi lea na faatamoe. E sau lava i Apia i aso uma ona o le faiga o oka, o le follow up ina o mea faapena. E fai lava si tele o tupe e alu ai.

O le mea foi lena e ala ai ona matou pipii atu, matou te lagolagoina le faamatuu mai, pe limasefulu afe e faamatuu mai, e vaai ai se taavale a fono faavae, o le agaga faafetai lena.

O le tulaga i falemai, e faafetai tele i galuega lelei, lau afioga i le Minisita ma le Matagaluega. E pei ona taua e se tasi o tootoo o lenei aso, o le faamai lea o le cancer. I think a cancer is a silent killer i le taimi lenei. E tele lava foi o tatou patients e ave i fafo, o le cancer lava. Ia ma e feoai feoai lava o la e malolosi, te i lava i le maliliu, ae sue atu o le cancer lava. Ae ou te tilotilo atu i le Tala o le Tupe, e na o le selau afe na e faaagaga mo le faalauiloa o le cancer. Ia se i toe silasila i ai lau afioga, i le toe fai o nisi awareness, ae taamilo i tua i nuu. Aua seiloga lava ua maua le tagata faatoa sau e siaki ua maua, ae ua tuai. A o lau lea tatalo atu i lau afioga, se i e silasila ifo i lena faamai o le cancer...

FOFOGA FETALAI: Ia talu ai o lea ua tatou taunuu mai i lo tatou taimi malolo, ua vaelupeina le saunoaga a lau afioga i le sui usufono mamalu, o le a toe faaauau, pe a toe talii mai le tatou malologa. O le tatou malolo e na o le sefululima minute.

Ou te faasilasila atu, ua faataatia ese nei Taulumaga a le Fono Aoao Faitulafono, mo lana malologa e sefululima minute.

Na faataatiaese Taulumaga a le Fono Aoao Faitulafono mo lana malologa i le itula e 3:15 i le afiafi, ma toe faaauau i le itula e 3:39 i le afiafi.

FOFOGA FETALAI: Ou te faasilasila atu ua toe amatalia nei Taulumaga o le Fono Aoao Faitulafono. E faamalo le onsosai i le paia o le tatou Palemene.

E faataatiaese ia Taulumaga mo le malologa o lo o saunoa ia le sui usufono mo Safata 2. O le avanoa lenei i lau afioga e faamaea mai foi le saunoaga.

Afioga LAUMATIAMANU RINGO M. PURCELL: Ia faafetai mo lou avanoa. E talitonu ua sao i alo foi le vaivevela o le aoauli, e momoli atu ai le agaga faafetai i lau afioga i le Fofoga Fetalai ma le mamalu o le Ofisa o le Fono.

O le taimi ua sola, o le tulaga o le faamai o le cancer, e pei ona fofola atu se lagona o lenei usugafono. Sa ou vaai foi i le Tala o le Tupe, o lo o faapena ona faaagaga le tasi miliona mo falemai i tua, e repair ai falemai. Ae ua lua nei vaiaso sa ou i le falemai, ia o tala e tuumumusu i lau afioga i le Minisita o le Soifua Maloloina, se i silasila i falemai, e tele lava vaega o le falemai ta te oo atu i ai, o lo o faatalitali i paelo ia tulaga o le tutulu mai o luga i le falemai. Ae ou te vaai e le o i ai se mea o faaagaga mo le tatou falemai tele, ae taua lava le falemai tele o lo o agai atu i ai le mamalu o le atunuu. E le matagofie le vaavaai atu, o talitali mai i paelo ia tulaga o lo o i ai le tatou falemai i Motootua.

Ona ou oo mai lea i le Minisita o Fesootaiga, lau afioga i le Minisita, o le vaavaai foi i tulaga o i ai a tatou services providers ia o le Digicel ma le Vodafone. E masalo ua faaoo atu foi nisi faitioga i le tulaga i le le lelei o le service, i nisi o vaega o le atunuu.

Ae se i silasila lau afioga ma le Pule Faatonu, i tulaga ia o promotions o lo o faagasolo nei, e vaega ia. Ia aemaise lava o le uma ona enter atu o la ta card, fai mai ua fia au points, e te agavaa i le fia...e te lavea i le selau afe, tulaga foi ia o promotion nei o lo o faasalalau, pe o follow ai. Aua o au ia, e talu lava ona ou i ai i totonu o nei telefoni, e le i maua lava so ta avanoa e maua ai sa ta credit fua. Ae se i silasila po o faamaoni nei kamupani i le faatinoina o latou promotions o lo o...pe tau faasee ia i tatou. A o tulaga lava e tataua ona tilotilo i ai le Pule Faatonu foi o le tatou Malo, ia faapena ona o gatusa ma fuafuaga e tataua ona faataunuuina.

Ona ou oo mai lea i le vaega lea o le Law Reform, lau afioga i le Tamaitai Palemia ma le Kapeneta, ou te iloa ua tele lava foi ni vaega o le tulaga o le sioki o loia i le taimi lenei. Ae po o fea o i ai le tofa, ae toe faafoi le Law Reform i lalo o le AG. E faapena, aua o lea e malamalama a maea ona draft e latou le Tulafono, e toe faafoi lava i le AG, latou te iloilo ina ma tulaga faapena. I lou lea talitonuga ua leai foi ni loia i lenei taimi, ou te iloa o le auala sao lea, e tataua ona toe foi le Law Reform i lalo o le AG, e faapena ona fuafua lelei ai, ia tulaga o le tusiina o le Tulafono ma le pasiaina o le Tulafono i totonu foi, aua ne i faaluaina le faiga o galuega. A i lalo lava o le AG, a maea ona siaki lea e le AG o Tulafono e pei ona i ai. O le matou lea tuumumusu, aemaise foi o se manatu o lenei usugafono, ina ia silasila i ai lau afioga i le Tamaitai Palemia, aemaise foi o le Kapeneta.

E i ai foi lou talitonuga faasui usufono, i le tulaga o le tatou NPO s ai ai, o le National Prosecution Office. E i ai lou talitonuga e tataua ona toe faatu le ofisa lenei. O le AG o lana matafaioi o le fautuaina o le Malo, i tulaga foi o Tulafono ma faaiuga fai a le Malo. Afai la e sese se tulaga e fautuaina ai e

le AG le Malo, sese se faaiuga e fai. O ai la e toe sau foi le AG e molia? Ae o le aoga lena o le NPO. O se Malo e lelei ona fuafua, o se Malo foi lena e le fefe i se NPO, o lou lea talitonuga. Ou te le faatonu ae na ona tuumumusu i le tatou Malo, ina ia toe faatu le lala lea o le NPO, ia mafai ona prosecute ai cases e le gata i officials a le Malo, ae aofia ai foi ma tatou o faipule, i le tulaga o le fautuaina e le AG o le Malo, i tulaga e feseetai ai, a o i ai le isi itu tino e faatinoina lea vaega.

Ona ou oo mai lea i manaoga o si ou itumalo. O le Minisita foi o lo o ou Minisita Lagolago ai. Lau afioga i le Minisita o Galuega Tetele a le Malo, ou te le toe tau... e tau lava ina ou faamanatu, ae ua silafia e lau afioga, o lea foi ou te nofo malamalama i tulaga foi o galuega ma auala e pei ona talosagaina. E pau lava lea o lou faamanatu, o le auala o le aoga i Vaiee, e pei ona tatou asia. O lea lava sa e saunoa mai e faatino, ae tau lava ina ou faamanatu, o nai fanau lava e palapala lava le auala e agai ai i le aoga pe a oo i le taimi o timuga.

Lona lua, o le nuu lava o Vaiee, o lo o ua uma ona faaoo atu le talosaga o le vai, e i ai le talitonuga, e le po pea se nuu. O tulaga foi o lea ua aapa mai le Malo, o le tatalo lena i lau afioga e faamanatu ia tulaga foi...e toe selau lava mita uma le auala o Tafitoala, o le tatalo i lau afioga. E faapena foi i si ou nuu o Fusi, i le tulaga foi o le fesootai o auala e lua, o le tatalo lava i lau afioga, e tuu atu pea i ina i lau afioga. E momoli le agaga faafetai o lou sui usufono, i tulaga foi o konekarate o lo o latou faatinoina le faataina ma le fonofonoina o auala i si o matou itumalo, e momoli le agaga faafetai ou te le iloa po o ai le konekarate. E momoli le agaga faafetai o lo o lelei lava galuega o lo o latou faatinoina, e momoli atu ai le agaga faafetai i lau afioga, aemaise o le vaega a le LTA, o le latou lea matafaioi.

Ona faaiu lea o se...

Afioga Sulamanaia Fetaiai Tauiiili Tuivasa: Lau afioga i le Fofoga Fetalai, pe maua se avanoa

FOFOGA FETALAI: Ia malie le sui usufono mamalu se i... o le a se mea o e faafinagaloina.

Afioga Sulamanaia Fetaiai Tauiiili Tuivasa: O le mea e fia faamalamalama, ona o lea e matau atu o le a faamaea le saunoaga a le sui Minisita. Ae faafesili atu i le sui usufono, o lea ua e toe taua ou auala lea e le i maea, pe ese mai auala ia na fai, i le taimi lea laa toe fai ai faiga palota. O lea sa alu atu ai lau Minisita toe sua lau auala i le taimi lena laa toe fai le bi-election. O auala na e le i maea, o lea ua e toe talosaga e faamaea? E pei o se agaga lena e faafesili atu ai i le sui usufono. O auala na na fai i le taimi lena, na uma loa ua e tulai mai, uma ai loa i ina. O lea la e te toe talosaga i lau Minisita e toe faaauau le auala lea. Ma lou agaga faaaloalo.

FOFOGA FETALAI: Ia saunoa lau afioga i le sui mamalu. Se i tuu atu le avanoa i le Minisita o Galuega Tetele.

Afioga Hon Olo Fiti Afoa Vaai: O le auala na faatino e le Faigamalo talu ai. Ae ona ua uma le latou taimi, ae le i faataina, ou alu atu loa au faata. E pei o le tali atu lena i le fesili a lau afioga i le sui usufono mamalu.

Susuga Hon Laauli Leuatea Polataivao Fosi: Ia faafetai lava ua faasao mai le upu na avatu, o Safata 2 o la e mau, a o Safata 1, o la e oge. Ia ma lou faaaloalo.

Afioga Leana Ronnie Posini: Lau afioga i le Fofoga Fetalai, ona o lea ua taua foi lenei itumalo. O la sa afio atu le Minisita o Faatoaga ma vaavaai i fua o faaeleeleaga a Safata 1. O lea foi na saunoa le Minisita Lagolago a le Ofisa o Faatoaga, na vaai i le tele o fua o faatoaga, ae na vave lava ona taulia uma. Na toe faatau lava e Safata, o tagata la ia na faataua, o Safata 2 lea na faataua oloa a Safata 1. Ma le faaaloalo.

FOFOGA FETALAI: Ia atonu o lea ua malamalama lea mataupu, ae tulai maia lau afioga i le sui usufono mamalu, e faamaea maia lau saunoaga. Ia se i toe tuu atu lava le avanoa lea i le Minisita o Faatoaga.

Susuga Hon Laauli Leuatea Polataivao Fosi: O mea lava e fia faamalamalama, o le saunoaga lava lena sa saunoa i ai le sui usufono o Safata 1, ua oge Samoa. O lona uiga o la e faasino tonu lava i lona itumalo. Ae le na o Safata na faataua mea i le aso lea. Na i ai exporters na i ai, lea na o atu faatau uma. A foi o le mea lava lena o lea sa faamalamalama atu, e fai loa uluai seleselega o atu loa tagata e faatau oloa e ave i fafo. O le faamalamalama lena, o oe lava lea na e saunoa ua oge Samoa. O lona uiga e faasinotonu lava i lou itumalo, a o Safata 1, o lea e mau.

Afioga Leana Ronnie Posini: Lau afioga o lea ua feeseeseai le Minisita ma le Minisita Lagolago, o lea ua eseese saunoaga ua fai mai i totonu o le Maota, e na o mea moni e aumai i totonu o le Maota.

FOFOGA FETALAI: E faamalulu atu i le sui usufono mamalu ua faauilavea, ia ua manino ia tulaga. Ia tulai mai lau afioga e faamaea mai lau saunoaga toe tasi le minute.

Afioga LAUMATIAMANU RINGO M. PURCELL: O le tulaga foi... o lea lava e manino ua toe faatau lava e Safata 1 ia Safata 1. O le tulaga i o matou auala, o lena ua tuutuu atu i ou autafa lau afioga i le Minisita o

Galuega. E tele lava foi nisi galuega ae o lo o faapena lava ona usitaia ia tulaga o lo o ave i ai le faamuamua a le tatou Matagaluega.

Ae avea ia lenei avanoa e momoli ai le agaga faafetai, i le Minisita o Tupe aemaise o le Matagaluega o Tupe, e le faigofie le galuega sa outou feagai ai. I le matou vaavaai o matou o le Komiti o Tupe, e le o se taimi e tasi po o se po e tasi e faatino ai, o le tausaga atoa e faatino ai, malo le galulue. Ia malo i lau afioga i le Ofisa Sili o Pulega ma le Matagaluega, i le faamaopoopoina, faapena foi i Ofisa Sili o Pulega o Matagaluega eseese, o e sa fai sao, aua le faamaopoopoina o le Tala o le Tupe, malo le galulue malo foi le faatoatoa.

E talia lelei e lenei itumalo le Tala o le Tupe 2023/2024. E momoli foi le agaga faafetai i atunuu i le faatinoina o isi vaega e ala mai fesoasoani e faalagolago i ai lo tatou atunuu, aemaise lava o le Tala o le Tupe. O se mitamitaga i le tilotilo i ai i le tatou Tala o le Tupe, i le vaavaai mamao a le Malo i le 2022 agai i le 2026, o lo o i ai le faamoemoe e faaitiitia i le tolusefulu lua pasene, o a tatou nonogatupe i atunuu mamao. O le agaga faafetai lea i le silasila mamao a lau afioga i le Minisita ma le Matagaluega, i lo outou galulue punouai, ia tatou maua lea sini ma lea moegamiti, ia faapena ona tatou taunuu i se taunuuga lelei.

E momoli foi le agaga faafetai i le matou Komiti o tupe, lau afioga i le Taitaifono ma le Sui Taitaifono, aemaise o le tatou Komiti. Ua outou le silasila lava i le pogisa, ae ua tatou galulue lava ona o outou faiva ma o tatou tiute.

E momoli foi le faafetai i le Failautusi ma le mamalu o le Ofisa o le Fono, i la outou foi pitolaau, e tusa ai ma le tausiga o fono a Komiti, aemaise foi o le faaalua o outou laufofoga fiafia i taimi uma, aua le tatou mafutaga ma le galuega.

O la matou toe tala, ia agalelei le Atua i lau afioga i le Fofoga Fetalai, maua pea lou malosi, maua lou onosai. E faapea foi i le Tamaitai Palemia, maua sona manatu aua le Kapeneta. Ia faapena foi ona i ai le faatofalaiga a le Atua.

O si ou itumalo, malo tatalo, malo foi le onosai ma le faapalepale. Ua ave lo tatou manao, ma le tulaga foi o le tatou sao i lenei Tala o le Tupe. Ia manuia tele le Fonotaga i lenei aso. Ma le faaaloalo lava.

FOFOGA FETALAI: Ia faamalo saunoa i lau afioga i le sui mamalu mai Safata 2, po o lau afioga foi i le Minisita Lagolago o Galuega Tetele a lo tatou Malo. E faafetai mo lou sao, e le gata i lea, o nisi foi o mea o finagalo i ai lou itumalo.

Ia o le taimi lea o lau afioga i le Sui Taitaifono o le tatou Komiti, lau afioga i le sui usufono Tamaitai mo Alataua i Sisifo.

Afioga ALIIMALEMANU MOTI MOMOEMAUSU ALOFA TUUAU (Sui Usufono Tamaitai - Alataua Sisifo): E faafetai mo le matou avanoa, lau afioga i le Fofoga Fetalai ma sui usufono mamalu o lenei Maota, faapea

foi Samoa ua mafai ona tatou faatasi i lenei itula afiafi, tainane le faafofoga tapuai mai a Samoa.

Ou te tulai atu ma le ava tele lava, se i fai le sao muamua o le itumalo o Alataua i Sisifo mo le Tala Faatatau Autu o le Tupe 2023/2024.

Ua ou taofi o sa ma faiga o lenei Maota, faapea paia ma mamalu o Samoa, i ona tulaga faalupe. Ua taoto alaia i saunoaga a sui usufono mamalu o e na asa le ataata o lenei Fonotaga. Ae pe ou te apaapa foi i ai, e le lilo pe lanu i se tau mamanu. Ae o paia foi ma mamalu e tumau, ua taoto tanu tuaoi o le va-vavae ma le va-tausi, i le faautaga a le au ponaoo. E mafua ai le taofi, ia taoto ia le laau ma ona lau, e le malu pe toe siia se paia po o se mamalu, i se tala a lou nei faatauvaa.

Lau afioga i le Fofoga Fetalai, se i fai muamua sina au tala i le vaaiga aoaotetele i le tamaoaiga. I le oo mai i le Palemene, e faisoo lava lau tala lea, o Samoa o le atunuu e faamanuiaina. E faamanuiaina e le Atua ma e le suia lava lenei talitonuga e oo mai i le taimi lenei, e le suia foi lenei mautinoa.

O le soifuga lenei e tupu pea le manao, e tupu ma le ola faatusatusa. E tatou te iloa i le siitia pea o le Tala Faatatau o Tupe i lea tausaga ma lea tausaga. Ae a tatou toe tepa i se isi itu pe a tatou vaavaai atu i le televise, i soifua sauaina ma le matelaina i atunuu i fafo. O i ina tonu lava tatou te molimauina ai le alofa tunoa o le Atua ia Samoa. O nisi o nei atunuu e malolosi tamaoaiga, ae ua ola i le fememeai ma le atuatuvaale, ona o faiga faaterorisi. O nei foi vaaiga i televise, e aumai ai lava le feau taua e pei ona maua i le tele o saunoaga i lenei Maota. O le ola soifua magafagafa ma le mataala. Aemaise o tatou o Taitai e puipui si o tatou atunuu, ona o le tele o aupega ma laau malosia ua faaulufale mai i si o tatou atunuu. Aemaise o laau faasaina ua tau le misi, le vaiaso i tala o vaifanua ma nusipepa faapea ma talitonuga eseese ua faaseseina ai le toatele.

O le feau taua lenei, mo tatou Taitai ia puipui si o tatou atunuu, ina ia aua ne i oo mai nei sauaga, ona tatou te le iloa pe mafai ona tatou manumalo ai. O le tiute lea o tatou o Taitai o Samoa, o le silasila i ni auala e puipui ai lo tatou atunuu. Ia faamautu se lumanai manuia ma filemu ma saogalemu mo tupulaga o Samoa o fai mai i so o se tulaga eseese o manaomia. O le tatou valaauina lea, o Taitai o Samoa, ia tapena ia malosia ma malu ia Samoa, mo a taeao. E taua ia te au le faamanatu a se tasi o tama matua o lenei Maota i le vaiaso na tea nei, “ aua nei galo lo taua valaauina.”

Lau afioga i le Fofoga Fetalai, o se tala lea o le a fai, e pei ona e saunoa mai, e le afea lava le lipoti a le Komiti o Tupe, o le matafaioi lenei a le matou Taitaifono, ae faataua le valaauina. E le toe tau faailo le aafiaga o le Koviti, o aiga uma o le lalolagi, ma o lea e faapea ona puea ai foi ma si o tatou atunuu ma le lotoifale. O lea sa faamauiina ai le pau o le tatou tamaoaiga, negative growth i le 2020, sau i le 2021, oo mai i le 2022 seia oo mai ia Iuni, sa negative growth uma tausaga na.

Ae o le faafetai, e faafetai o lea ua toe sologa lelei le fefaatauaiga, femalagaiga lea ua toe tatala, ma nisi o auaunaga, ma ua atagia lea i le toe faatupulaia o le tamaoaiga.

O le saunoaga a le Minisita o Tupe, o lo o fuafua e oo atu i le 4.7 ia le siitaga o le tamaoaiga o le tatou atunuu i le faaiuga o le tausaga faaletupe lenei ia Iuni 2023. O le fesili, o le a le uiga o lea tala o le siitia o le tamaoaiga? O le a le uiga o le tamaoaiga? O le siitia lea mo au, mo oe, ma le tama ma le tina o la e tapuai mai tua i nuu ma aiga, o le a le uiga? O le tali, o le a siitia le aofai o oloa e gaosi i totonu o le tatou lava atunuu. E lavea ai fua o faatoaga ma auaunaga i totonu o le atunuu, e i ai faletalimalo. Ma o lona uiga, o le a pau ai foi i lalo ma le pasene o aitalafu. Aua a sii i luga le tamaoaiga, ua pau i lalo pasene o aitalafu.

O le fesili e aumai pea e le toatele o le atunuu, e pau ai la i lalo le tau o oloa pe a siitia le tamaoaiga? O le tali, e leai. Aua foi e ese lava le siitia o le tamaoaiga, ese le siitia o le taugata o le soifuaga. O lea e aafia ai le tagata soifua i aso uma aso uma. E le iloa la i le fua lea e faaoga mo le fuaina o le tamaoaiga, pe o maua e tagata uma basic needs, lea e i ai le vai, o le eletise, o aoga, falemai, o mea uma faapena, o lea tatou te manaomia i aso fai soo.

O le saunoaga a le Minisita o Tupe lea na ia taua ai, o lo o fuafua e siitia i le sefululua pasene le tau o le soifuaga, i le faaiuga o Iuni lenei 2023. Ma ua tatou iloa uma lava le mafuaaga o le siitia o oloa mai fafo. E pei ona sa felafolafoai ai le Maota, e faapea foi ona saunoa i ai nisi o Minisita o le Kapeneta. A o lau fesili, o le a la sa tatou fofu, e tau faamama avega i le atunuu. O lea ua siitia totogi o le aufaigaluega a le Malo, faafetai. Ae o le a faafefea nai tagata o lo o faigaluega i pisinisi ma Kamupani? E sao e pule lava le aufaipisinisi ma Kamupani, ae i ai foi le leo o tatou le Malo e uunaia ai. Ae faafefea si toaina ma si loomatua lea e luaselau tala, i le masina lana penisione e maua? E faapefea le aufaifaatoaga, ma le aufaifaiva?

Lau afioga i le Fofoga Fetalai, e ui o lo o i ai toatuga i le tamaoaiga ona o aafiaga, e le oo i ai so tatou malosi. Ae ou te talitonu o lo o mafai pea ona tali atu le Malo e auala atu lea i se fesoasoani. O se faamama avega, se stimulus package, ma uunai a tatou atinae tetele e maua ai galuega a tagata, e tau tali atu ai nei luitau, ma ia usitaia a tatou faiga faavae.

O le lipoti a le Central Bank, sa tulai mai ai tupe faaleoleo faaagaga i le faaiuga o Tesema 2020, i le \$11.9 miliona, e mafai ai ona aumai a tatou oloa mai fafo. Ma o le lipoti talu ai nei, e pei o lea sa maua e le Maota, ua pau atu i le 9.7 masina. O lona uiga e tau mai ai i i, o lo o malosi lava le aumai o oloa mai fafo, e fua i le pau o le pasene lea.

E faataua ai e lenei usugafono le polokalame a le Matagaluega o Faatoaga ma Faiga Faiva, ia le uunaia lea o le aufaifaatoaga ma le aufaifaiva, ina ia le gata ia siitia oloa aua le auina atu i fafo, aua le tamaoaiga, ae o le fofoga taumafa foi o le tatou atunuu.

O le masina na tea nei lau afioga i le Fofoga Fetalai, na atoa ai le sefululua masina, sa faailogaina ai le tatou onosefulu tausaga talu ona tutoatasi Samoa. Ona ou mafaufau lava lea ma ou fesili ifo, pe sa faapefea ona fau mai Samoa mai le onosefulu tausaga talu ai. I le tulaga lea ua tatou aeae ai nei, ma sapi ai a tatou augatupulaga. Pe sa faapefea ona faatino le galuega sa fau aso fau po, e i latou na mua i malae, o nisi foi o tuua ua lagomau mai tiasa. Ona o lea e talanoaina le Tala Faatatau o le Tupe, ona ou fesili lea, pe sa faapefea le folauga mai a le Palemene, i le tulaga tau tupe i le onosefulu tausaga ua tuanai.

Na fai mai le tala, sa fau mai i puapuaga. Ma ou te fia faatepa ai lenei Maota.

O le onosefulu tausaga ua tuanai i faamaumauga o Tala Faatatau o Tupe. E talitonu o le toatele o e o lo o i totonu o lenei Maota, e le i soifua mai i lea taimi, e auga i ai ni manatu ma ni tuualalo o le a avatu. E tolu lava vaega tetele na amata mai lava le tatou tutoatasi o tapena i ai a tatou Tala Faatatau o le Tupe. E muamua o tupe alu faale-tulafono po o le totogiina lea o aitalafu, ma totogi o tofiga taualoa. O lona lua, o polokalame o galuega e aofia atoa ai totogi o le aufaigaluega ma auunaga eseese o le vai, eletise ma tulaga uma faapena. O lona tolu, o polokalame o atinae. O faiga faavae lava na mai le amataga, o lea e faafetai o lea tatou te sosolo ai lava e oo mai i le taimi lenei.

O le amataga mai o le tutoatasi, o tupe alu faaletulafono ma polokalame o galuega, sa na o le \$2.1 miliona. Sa faatupe uma lava i totonu o le atunuu, e vagana ai le luaselau ma le lima afe na aumai ia tatou paaga. E luasefulu tausaga, e va ai, ua siitia le tala faatatau o le tupe i le ivasefulu fitu pasene. E 46.9 tupe alu faaletulafono ma tupe na faapolokalameina ai le auunaga. Ae 44.1 na faatino ai atinae. E \$91 miliona le tala o le tupe i lona vaitau.

Sa faatupeina atoa i tupe maua i totonu o le tatou atunuu. Sa i ai foi meaalofa mai tatou paaga, e \$17.6 miliona, o i ina foi sa amata mai ai a tatou faiga nonogatupe, lea sa i ai le 14.2.

E luasefulu tausaga e va ai, 2024 ua oo i luga le Tala Faatatau o le tupe, \$296.7 miliona. O tupe alu i le atinae, 93.4. E 390.2, sa faatupeina i totonu o le tatou atunuu, le 99% o le tatou Tala Faatatau lea o le tupe. E \$295 miliona sa maua i totonu o le atunuu, sa maua mai i meaalofa mai tatou paaga.

FOFOGA FETALAI: Ia malie le sui usufono mamalu, se i tuu atu le avanoa i le Minisita o Pisinisi ma Alamanuia ma Leipa.

Tofa Hon Leatinuu Wayne Soialo: E momoli atu le faafetai tele i le sui usufono o lo o lauga i lenei taimi. E pau a le faafesili po o se lauga o le Tala o le Tupe ua tuanai, po o se lauga o se Tala o le Tupe e le i oo, po o se lauga o le Tala o le Tupe o lo o fuafua i luga o le Tala o le Tupe o lo o taatia i le

taimi lenei. Ona o lea e foliga mai o lo o ua alu agai tua le lauga a le sui usufono mamalu foi a o lea tatou te fia faalogologo pe faapei mai le Tala o le Tupe o lo o i ai le taimi lenei mo le agai i luma.

Ia pau lea o le faafesili lau Afioga i le Fofoga Fetalai.

FOFOGA FETALAI: Malo. A o se faamanatu foi lena a le Nofoa, o lea lava e tau o le avanoa lava e tuu atu i lo outou Komiti, talosia ia taua i lo outou Komiti ia saunoaga ua aumai i luma o le Palemene ma le faafofogaaga a le Maota, ia po o ua maua mai le agaga o le Minisita lau Afioga i le sui usufono mamalu.

Afioga ALIIMALEMANU MOTI MOMOEMAUSU ALOFA TUUAU: Lau Afioga i le Fofoga Fetalai, o lea ou te malamalama lelei, o lauga faalauaitele e pei ona tau fai atu se tala na ona ou faatepa a i tua, lea e tai 20 tausaga lea e oto atu e auga i ai sau tala lea la avatu. Lea ua oo tonu mai a le tausaga lenei, 20 tausaga e va ai lea la ua \$939.4 a tatou tupe alu faaletulafono ma polokalame o galuega, 141.7 e alu i atinae lea e i ai le tatou \$1.08 piliona.

O le auga la o le tala, o le faatupeina o le tala o le tupe lea na ala ai ona ou taumafai e ootoo atu. Sa mafai ona faatupe uma mai le piliota ia tai 20 tausaga a tatou tala faatatau o le tupe i tupe maua lava i totonu o le atunuu. O le auga foi lena o se tala na fai atu i le amataga e tupu pea le manao, tupu le ola faatusatusa.

O le tatou tala faatatau la o le tupe lenei, lea foi sa maua e nisi.

Lau Afioga i le Fofoga Fetalai.

FOFOGA FETALAI: Ia malie le sui usufono mamalu se i tulai mai lau Afioga i le Minisita o le Siosiomaga.

Afioga Hon Toeolesulusulu Cedric Pose Salesa Schuster: Faafetai lava lau Afioga i le Fofoga Fetalai, faafetai atu foi i le Afioga i le sui usufono mamalu e tusa ai o le faatepaina o le Maota i tai 20 tausaga pe tai 10 tausaga. A o se faafesili la, pe mafai lava ona e oto mai le 10 tausaga agai mai iinei, pe fia ni loan na fai e faatino ai le Tala o le Tupe, ona o lea ua e saunoa e tai 20 tausaga lea na faatupe i totonu o tatou tupe maua. A o totonu o le 15 tausaga lea na tea atu nei lea ua ala ai ona tele tatou aitalafu lea iai ona o atinae.

E moni e taua le tele o atinae ae ao ona faapaleni pea le tatou silasila e pei ona taumafai mai ai le sui usufono. Faafetai .

FOFOGA FETALAI: Ia mo le faasaoina o le taimi o le sui usufono mamalu se i tuu atu le avanoa i le Afioga i le Minisita o Galuega Tetele.

Tofa Hon Olo Fiti Afoa Vaai: Faafetai, na o si vala lava lea e faasao ona o le tulaga le ootoga lea ua aumai nei i le tai 20 tausaga, i le tausaga leaga o au sa fai ai lau research i le taimi ua tuanai.

Mai lava i le 1970-1979 ma le 1980 sa pau lava na o le taimi sa mafai ai ona faatupe le tamaoaiga i tupe maua lava a nai toeaiaina i na taimi, sauai sauai laia ona oo mai laia faatoa fai a le latou \$15,000 aitalafu i le Corporate Board i lene taimi 1971-1972, 1981-82 oo mai loa i le 84-85 o i ina lea na puga ai luga le tatou aitalafu e 45 miliona , na sau ai a laia sau ai a laia.

E i ai le taimi sa laga mai ai le tatou mataupu lea i le tatou threshold foi lea o le 40% foi lea tamaoaiga i mea ia o aitalafu. Ina ua ou taunuu mai i le 2006, sa i ai le tulaga lene o le 40%, ona sau ai a laia, sau ai lea siisii i luga i le 41, 42, 43 ona e alu loa i luga le aitalafu ona fetagofi loa lea o le faigamalo sii i luga le threshold lene, lea la ua tatou oo mai la i le taimi lea taua ua 52%. Ae o le mea leaga ou tulai atu e faasao e lei iai se tulaga faapea na aumai le tai 20 tausaga o taimi na faatupeina ai lava ia tatou aitnae ma le tamaoaiga o Samoa i tupe na maua i totonu o tatou i inei, tatou loan mai i le 1984 ina ua tulai mai lene faigamalo ma le faaaloalo.

FOFOGA FETALAI: Masalo lea ua maua mai e le Afioga i le sui usufono mamalu, ia faaauau lau saunoaga.

Afioga ALIIMALEMANU MOTI MOMOEMAUSU ALOFA TUUAU: Lau Afioga i le Fofoga Fetalai, ou te talitonu e le malamalama Afioga i Minisita i lau tala lea na fai. O lea na tau faavasega atu ai o tupe alu faaletulafono ma polokalame o galuega i le faatinoina o le atunuu, tupe na o lea ou te talanoa iai. A lea sa laulau atu a ma loans, tupe na lea sa faaalu i atinae, pau a le mea ou te, e tau tatau iai le tala le faatinoina o galuega i totonu lava o le Malo leo afea atinae. A lea sa fai atu foi sa fai foi loans o lea 1984 e \$14.2 miliona le loan, \$224.8 miliona le loan mo atinae.

O le uiga o le tala lea taumafai e atu, galuega a ia i totonu o le tatou Malo e faatupeina o totogi a le aufaigaluega a le Malo ma le totogiina o aitalafu o le uiga lene o le tala. Tupe alu faaletulafono ma Polokalame o Galuega, sa mafai ona faatupe atoa ao isi atinae ma meauma sa faatupe mai i nonogatupe ao le uiga lene o le tala, ua oo mai lenei vaitau ua leo toe mafai ona gafatia.

Lau Afioga i le Fofoga Fetalai, o lea ua tatou iloa uma a leaga na amata mai ai a le tutoatasi o aumai mealofa mai paaga. Tatou te faamoemoe i tupe faamealofa mai a tatou paaga, e fai ai a tatou auaunaga masani totonu o le atunuu aemaise lava le atinae. O le manatu la lea e tau avatu e faamoemoe le aumai o tupe nei mai a tatou paaga lea fai ai ia atinae tetele ia tatou faigamalo, tatou taitai ma le aufagaluega uma a le Malo.

E faalagolago ia te tatou taitai ma le aufaigaluega uma le faatinoina o galuega i taimi faatapulaaina, faapea le mulimulitaia o faigafaavae. O le talitonuina o faigamalo lelei o le faaauau foi lea ona aumai o fesoasoani mai

a tatou paaga, lea a siitia ai luga. O lona uiga o le oo atu i le piliona o le Tala Faatatau o le Tupe e tatau ona tatou mataitu lelei galuega e ausia mai e le piliona aua le atinaeina o le atunuu, o le auga atoa lea o le tala lea sa tau faiatu e faailoa iai , ua leo toe gafatia i totonu o le tatou atunuu, totogiina o le afaigaluega ma galuega fai.

Ia o upu a lenei Maota e le milia faauu upu a le lauga a le Palemene ae a maea e tumau a le ava fatafata le faaaloalo. Lau Afioga i e Fofoga Fetalai o mea nei o Tala Faatatau o le Tupe e pei ona maua i nisi o saunoaga mo fuafuaaga, faatoa maua le atoatoa pea sao nei fuafuaga, pe sa sao pea maua mai faamatalaga o tupe a le Malo poo actuals ae paga lea o lea gata faamatalaga o le faaaogaina o tupe a le Malo i le 2019-2020.

Mo le tuuina mai o le Palemene, e faatusatusa iai le Tala Faatatau o le Tupe , poo talafeagai e aoga tele a lipoti ia mo le Komiti Tupe e fautuaina ai lau Afioga i le Minisita o Tupe , o le tuualalo foi o lea ua tele na aumai i le Palemene lipoti faaletausaga a Faalapotopotoga 2020-/2021 ma le 2021/2022 lea foi sa tatou talanoa ai i le vaiaso ua tuanai , ae o loo talia pea faamatalaga o tupe o Matagaluega uma a le Malo Actuals 2020/2021.

Lea ua foi ua due le 2021/2022 o tatou sa fausia Tulafono ma faiga faavae tau tupe, e tatau ona usitaia e Matagaluega ma Faalapotopotoga uma a le Malo. O le tatou Matagaluega foi e tatau ona tau solomua le usitaia o ia Tulafono. O le auga o faamatalaga poo actuals ia e aoga lea e tatou te toe fuafua tatau ai I galuega na ausia, faapea foi le faaaogaina tatau o tupe na faamatuu atu i ai.

E momoli atu le faafetai lau Afioga i le Minisita faapea le Matagaluega o Tupe ma le afaigaluega uma a le Malo. E pei ona maua i nisi o saunoaga e le faigofie le taufetuunai soo.

FOFOGA FETALAI: E toe 3 minute o le sui.

Afioga ALIIMALEMANU MOTI MOMOEMAUSU ALOFA TUUAU: Ina ia mafai ona ausia manaoga, o le faafetai faapitoa o le faafetai i le Faalapotopotoga lea o le Faalavelave Faafuasei aemaise le tatou Faalapotopotoga lea o e SIFA , lea matauina pea mai le 2004 e oo mai lenei taimi o loo aumai pea le latou fesoasoani lea le 15 miliona. E tele le taua o le SIFA ona e tele tatou tupe e maua mai ai , faatupe ai tala faatatau o le tupe, ma o se tasi o pisinisi sa lagalaga ai nisi o manatu totonu o lenei maota talu ai nei, ma fesiligia ai pe leo ni tupe palapala. Ae ou te talitonu o loo saogalemu lelei lava ia la tatou Matagaluega lea, poo le Faalapotopotoga aua foi e faatino i fafo pisinisi, ae totogi mai laisene i inei e maua ai tatou tupe.

O lea sa ou faitau le press release a le Ofisa a le Palemia i se isi foi ituaiga similar i le SIFA ma o loo iai le fuafuaaga e faatino se Feasibility Study, talitonu foi o isi foi ia tapenaga a le tatou Malo ina ia maua ai nisi o tatou tupe , aua lava le faatupeina o tala faatatau a le Tupe le tatou stock exchange

. O le tuualalo faateletelegese ina ia maea lelei Feasibility Study ona o le popolega lou lava sui ona e iai foi si ou malamalama i ia ituaiga pisinisi. E te ono miliona taeao ae oo le isi vaiaso ua e bankrupt. O le popolega lava o tatou eleele ma Fanua ina nei aafia, ona faauma lea o se tala lau Afioga i le Fofoga Fetalai . Faafetai le poloketi o le miliona ae iai a si ou vaivai lea tau tuu atu lea tatou te unaia Faatoaga ma le au Faifaiva o iina lea ua tatou mautinoa e toe unai ai luga le tamaoaiga ae paga lea ua aveese ia auala galue, toatele sui e lauga ai, ae poo lea sou finagalo ae toe tagatagai ane aemaise lava si o matou Nuu lea o Neiafu lea e numera tasi mai le ava.

E mamao tele i uta mea iai ia maumaga faapea foi togaava , e uma ae ua alu uma ai a le miliona o le matou Itumalo poo lea se faiga ae ua lava se 500 afe e faatupe e Itumalo mo se auala galue, ae toe faamatuu atu. O e uma la i lalo ifo i le 500 latou auala galue ia fai pea e latou ao e ua ova atu i luga. Ia pe afa faagata le \$500 afe le tupe e aumai mai le Itumalo ae faatupe e le Afioga i le Minisita lo latou tala faataau o le tupe.

E tasi a le manaoga o si o matou Itumalo, na o le matau Kolisi lea i Alataua i Sisifo a le afaina o lea e afio le Minisita o Aoga ae ou te talitonu e leai foi se mea e mafai ona fai pea afai e le auai mai le finagalo le Afioga i le Tamaitai Minisita o Tupe ae taatia atu, e le aoga le talosaga soo ae leai se mea e tupu.

Ia lau Afioga i le Fofoga Fetalai o lea foi se leo a Alataua i Sisifo, e momoli atu le agaga faafetai i lau Afioga i le Palemia ma le Kapeneta faamalo le onosai malo le tautua atunuu e le faigofie la outou galuega, aua fita ma tagutugutu le ala i luitau ma tofotofoga ao le Atua lava e faamoemoe iai e mafai ai, faamalo tautua atunuu tau ina agalelei le Atua i faamoemoega.

Liliu mai se tala i lenei itu ia manuia le alofaiva aua le faataunuuina o matafaioi aiaia a le tatou Maota. Tau ina agalelei atu le Atua i lavisiga ma faamoemoega. E momoli atu foi le faafetai i Faauluuluga, Pulega ma aufaigaluega ma Faalapotopotoga faapea le Ofisa o le Fono, faamalo i lo outou faiva tautua i le Malo o Samoa.

Si ou Itumalo Alataua i Sisifo, faafetai tatalo, faafetai mo le tapuaiga, e maua ai pea manatu ma le malosi aua se auaunaga ua mafai ona fai. Faamanuia le Atua lau Afioga i le Fofoga Fetalai. Manuia le fonousu Samoa soifua.

FOFOGA FETALAI: Malo saunoa.

Susuga Mulipola Anarosa Ale Molioo (Minisita o Tupe): Lau Afioga i le Fofoga Fetalai.

FOFOGA FETALAI: Se i tulai mai lau Afioga i le Tamaitai Minisita.

Susuga Mulipola Anarosa Ale Molioo: Sa musu lava e faalavelave i le saunoaga matagofie foi a le Afioga i le Tamaitai Faipule, ae pau lava o le faasaoina o tatou faamaumauga. O le vaegatupe o loo agalelei mai ai le tatou SIFA e \$20 miliona e le \$15 miliona mo le faasaoina o tatou faamaumauga ma le faaaloalo lau Afioga.

FOFOGA FETALAI: Malo faafetai mo le faasaoina o le saunoaga, leaga o lea foi na oo saunoaga a le sui i tatou lipoti foi ia lea e aumai i le Palemene, lea na tatou amata i le vaiaso muamua o isi tatou lipoti tuai o le 2019/2020 ma le 2020/2021 masalo e uma le tatou Tala o le Tupe tatou faasolosolo atu i ai. A o lena ua outou silafia le mafuaaga na ala ai ona tuai na aumai i le Palemene e le tau toe faailoa atu. E pei o le agaga lena lea sa faailoa atu, pei o le agaga lea sa faailoa mai e le sui usufono mamalu ae malo mo lou sao.

O le taimi lenei o lau Afioga i le Taitai o le Itu Agai, e fetau lelei lava lau 30 minute.

Tofa Hon LAUOFO FONOTOE NUAFESILI PIERRE LAUOFO: E 30 minute pe a leai a ma se faalavelave faafetai lau Afioga i le Fofoga Fetalai. Ia lea ua oo mai le faasologa o lea a taumafai atu nai motugaafa ae faamalo le faapalepale i le la vaiaso ma lenei vaiaso i faagasologa o le tatou fonotaga. E momoli foi le faamalo le la foi itu o le Maota i le Afio o le Afioga i le Palemia ma le Sui Palemia ma Minista Lagolago ma Afioga i Minisita, faapea foi lenei itu o le malu.

Faamalo foi i le taupati mai o Afioga i Faatonusili po o Faauluuluga a Matagaluega a le tatou Malo, faapea foi le tapuaiga a Samoa i ona paia faaleatunuu faapea foi paia faaletalalelei ia ma le loaloa o Samoa ua faafogafoga mai ma taputapu mai i le tatou fonotaga.

Ia e faafetai i le Afioga i le Minisita aua e tataua ona faamauina se faafetai, ae faapea foi le afaigaluega a le Ofisa o le Tupe mo le galuega sa fitaituga ai le i tuufatasiga o lenei Tala Faatatau Autu o le Tupe. E famauina foi le faafetai i le Afioga i le Taitaifono o le Komiti o le Tupe, faapea ia sui mamalu o le Komiti mo le latou Lipoti. O lea ua taoto le laulau a fono. Ia faamalo le galulue, o lea sa maua tala sa outou galulue i le ao ma le po i le 14 aso i le tau tuufaatasiga o le Tala o le Tupe ina ua maea ona iloilo.

Malo faafetai. E faamauina foi le faamalo i le saunoaga faataupou a le Afioga ia Lautimuia Vaai o le sui usufono o Vaimauga 3. Faamalo faafetai foi i le saunoaga faataupo i totonu o le tatou Maota.

Lau Afioga i le Fofoga Fetalai e manatu e le toe tele foi se matou foi faamatalaga, o lea ua tele na faafogoga le Maota i saunoaga matagofie mataupu uma taua sa oo foi ma afea i saunoaga. Faafetai foi i le saunoaga i le Sui Taitaifono o le Komiti o Tupe o lea faatoa maea atu ua lava foi lea mo au i le faataotoga mai o tatou talaaga ma le tulaga ua i ai nei le tamaoaiga faamalo faafetai.

Lau Afioga i le Fofoga Fetalai e taua tele le galuega a le Suetusi Sili ma le Okika. O loo aiaia i lalo o le latou foi Tulafono le manulauti poo auau atoa o le latou galuega le siakiina lea ma le toe faamaonia o le faaaogaina o tupe a le Malo. E faapea foi le tulaga o le faatinoga o galuega po o performance o lo o faatino ai performance audit, faapea foi ma isi ituaiga galuega o loo okika e le tatou ofisa lea.

E faamalo faafetai le galulue ona o le Ofisa taua tele le Ofisa lea i lau matau i le vaaiga o tatou galuega ma le faaaogaina ma le faaaluina o tupe, ina ia tatau ma tutusa ai ma le Tulafono. O latou foi lea o loo vaaia uma galuega uma poo lava galuega e faatino atu i tua atu o le Ofisa lea, pei o i le maua ai le malosiaga a faatino foi tua se galuega e toe foi mai a i totonu o le Ofisa o le tatou Suetusi Sili.

O lea ua matauina i le lipoti o le Komiti o Tupe le faavaeina o se avanoa fou i lalo le audit director aua le vaaia le national integrity, le polokalame lalo aua le vaaiga o le tatou Malo ma tulaga uma o le faagaioiina o le faaaogaina o tupe poo iai le tulaga lea o le faamaoni ma le amiotonu i tulaga o seleni.

Ia lea foi ua matauina ua toe faagaga foi seleni mo le tatou Forensic Audit sa ou taua foi ma afea i lau lauga o le Tala o le Tupe talu ai ona la foi sa faaagaaga tupe i lalo o le tala o le tupe lena mo le forensic audit e fesili atu ai i le Afioga i le Taitaifono le Komiti o Tupe, po o lea se tala lata mai? Po o fea ua agai ai le galuega lea o lea foi ua toe faagaaga isi tupe mo lea foi tala o le tupe ae po o ua tino mai se tatou galuega i le galuega lea faapea faatino le forensic audit. A o lea foi matauina ma ua maua le tulaga i le faaaliga mai le ofisa a le okika e toasefulu le aufaigaluega ua agavaa e faatino lea galuega ae pei o le fesili atu lea lau Afioga ona o lea lava o loo faaagaaga le tupe ae le o maua mai lava se tala poo lea tulaga ua iai.

O le tulaga lea o le Tulafono a le Ofisa Okika o loo i ai le malosiaga o vaega uma ia, aua manatua foi o le Okika e lipoti sao mai a le Maota lenei, e le lipoti i le Kapeneta. O le taua lena o lana galuega o i foi la e agai uma ai galuega suesuega mea tau Okika. A o le taua foi o latou o le vave faatino galuega ia i le taimi e tupu ai pe aliae ai se vaega foi lea poo se mea ua tupu ua aliae ai le faaletonu. E lelei le vave faagaioi o le latou galuega ao la iai pepa faamaumaga ia o ata foi ma agai foi ni asiasiga, silasila i ai ona fai ai lea o le latou lipoti. E lelei a le tupu ma fai loa ma faatino, a o le umi foi lea ona taatia le iloa pe toe sue atu ua le maua ni faamaumaga ma tulaga faapena.

Ae o le tulaga lena ua ou afea ai le vaega lea ona e fai si tele o vaegatupe lea e faaagaga ae le i maua se tala lata mai. O le tatou vaega foi o le Tupe lea mo le atinaeina o Itumalo ma Afioga lau Afioga i le Minisita o lea ua ou vaavaai atu i le lipoti a le Komiti o Tupe o lea ua aumai ai le faaaliga e faapea e i ai le \$28 miliona la ua totoe. O lona uiga e pei o le tele o isi Itumalo ua faamatuu i ai le \$425 afe a o lea totoe le isi \$425 afe lea la iai le 28 miliona

lea totoe lea la ua faasee i se special account lea pei o lo o aumaia i le lipoti a le Komiti a lau Afioga ma lo outou vaega faapea e taatia ai i ina. O le tupe la lena e faamatuu ia Tesema o le tausaga nei 2023.

Mo le silafia e lau Afioga o lenei Itumalo lea ua uma ona ave i totonu pepa uma po o le faaaogaina o le 425 afe muamua, lea la iai le fautuaga e lelei le vave faamatuu mai o le isi afa lea o le isi 425 afe lea e totoe aua le faagaioiga o galuega mo lea 6 masina lumanai. Aua afai pe faamatuu mai ia Tesema ia lea foi ua pasi ai i i le isi miliona lona uiga e oo atu ia Ianuari tausaga fou, Ianuari – Iuni le isi tala faatatau autu o le tupe e faaoga ai le miliona e puupuu le taimi.

E pei o le uiga lena o le faamatalaga lea e fai atu pe mafai ona faavave matuu mai le seleni ona tele lea o le taimi e faaoga ai le isi miliona lea ua aumai totonu i le tala faatatau o le tupe lenei ina ia lelei le spread o le aumaiga o tupe ona lelei foi lea faasolo le faatinoga o atinae i totonu o Itumalo. O le matou itumalo ua maea uma la foi ua ave totonu pepa uma, e momoli atu ai foi le faafetai. E faamau ai foi le faafetai o la ua tufatufa faapena ia tulaga mo meafaigaluega mo faitoaga mo matou Nu'u e 7. O le tulaga fiafia lena ae pei a lena o le atugaluga lea e i ai i lou taofi, ona o le tulaga lena o le taimi pei la utiuti le taimi a o lena ua maua mai e lau Afioga le uiga o le tala.

O le \$10 miliona lea e aumai i le lipoti a le Komiti o Tupe lau Afioga i le Taitaifono, aumai mai o le ACC e faatupe ai le siitaga lea a le aufaigaluega a le Malo. Faafetai. Ia o mea a ia sa ta moomoo ai foi ita a o galue totonu o le Malo, o le taimi e maua ai siitaga aua e maua se tupe faaopopo aua tausiga o aiga. A o lea foi ua ou tilotilo atu i i e leai lava se isi o tatou e le o manaomia se seleni mo fuafuaga faaleaiga ma tulaga o le soifuaga e pei ona i ai. Ae o lea ou te tilotilo atu faafesili atu ai foi i lau Afioga e \$10 miliona lea e faasee mai le ACC i i e faatino ai le siitaga lea ona o le \$10 miliona lea ou te matau tusa o tupe ia lea sa tipi mai totogi o le aufaigaluega, e le gata i le aufaigaluega a le Malo faapea foi aufaigaluega a le private sector 1 % lea tipi mai latou totogi ave i le ACC, o le ACC levy, o lona uiga lea la toe avatu le 10 miliona lea a o tupe ua already earned, tupe ia lea na tipi mai foi latou totogi, a o lea la toe avatu e toe fai ai latou siitaga. Ae a oo la ina togitogi e toe tipi mai foi la le isi 1 % e toe ave i le ACC.

O le fesili lena lau Afioga se i silasila ane, po o lea se faamalamalamaga o le tulaga lea pe atoa le 10 % le siitaga lea fai, pe a fua le tulaga faapena aua a sii foi lou totogi, ua sii foi le tupe e tipi e 1%. E pei o le vaega lea aua o tupe a ia o tupe a tagata na tipi mai isi latou totogi muamua.

O le vaega la lena e fia malamalama ai lou nei sui aua e pei o le tulaga tataua ona talafeagai ma fea, afai o lea la ave le 10 miliona o tupe a tagata na tipi mai muamua i latou totogi, e pei la e foliga mai e le tataua ona toe tipi ese le % mai a latou totogi mo le taimi lea faatino ai le siitaga .

Ma le mea lona lua 10 miliona la a aumai mo le tausaga faaletupe muamua ae 2 tausaga e faatino ai siitaga. O le fesili po o lea se tali mai a le tatou Komiti mo le isi tausaga e sosoo ai, po o fea la aumai ai le isi 10 miliona e toe faatino ai le tausaga lona lua, pe aumai lava i le ACC pe aumai se isi source. E pei o le mafuaaga ia o nai fesili ia fia maua ai se faamaninoga mai lau Afioga ma le tatou Komiti i le faaaogaina o nai tatou seleni ia aua le afaigaluega . Ae lea foi sa fesili le Afioga i le Sui Taitaifono i le tulaga la lea o latou private sector aua o le 10 miliona lea mai le ACC o lea foi iai ma tupe 1% la e tipi mai totogi a private sector mo latou ia, pe i ai se fuafuaga pe leai. O nai fesili na e fia maua ai se maninoga mai lau Afioga o lea ou te vaai atu lea aumai lau lipoti ia vaega ia.

E momoli atu ai le faamalo i tulaga e pei ona i ai aua o lea e te vaavaai atu i Tala o le Tupe o isi foi tausaga ua tuanai, e pei o lea sa gafatia lava e tupe maua a le tatou Malo le revenue collection masani a le Malo ona faatupe tatou siitaga po o se faiga fou lea Faiga lea ua faasee mai ile ACC le vaega tupe lea aua le faamoemoe e pei ona i ai. Ae pei ona ou fai atu e taua siitaga manaomia e tatou siitaga, manaomia e tatou seleni.

O tulaga lena e pei o se vaavaai atu ai i le seleni e pei ona aumai, ae o lea matauina o lea ua toe faaagaga foi isi tupe mo tatou Samoa Export Authority lea foi sa ou lauga ai le isi tala o le tupe a o lea lava e foliga mai o lea foi ua toe faaagaga tupe ae lea pei e foliga mai i le lipoti a lau Afioga e le i faavaeina ma faatuina le tatou Export Authority. O le a se tala mai lea atinae ma lea faamoemoe po o ua faatu pe leai? Aua lea pei e foliga mai o lea foi e toe manaomia se tupe e faavae ai lena faamoemoe. O mea lelei o lea e taumafai aua le atunuu a o le fesili e fia malamalama ai aua lea foi e aumai lau lipoti i le tulaga lena. Ae i ai le lagona o le Samoa Export Authority e pei e tau tilotilo ou te le iloa po o le a sa outou iloilogia i le tala o le tupe ae pei ou te tau matau au pei o se mea foi lea e tataua ona tuu i le private sector e fai e latou ma faatino e latou. Ou te le iloa iai po o le a, ae lafo atu pea po o le a sau saunoaga i lea tulaga ia pe mafai ona fai e le Private Sector ia ae faamatuu iai i a latou e faatino lea faamoemoe, ae faasaoina mai ai isi seleni a le tatou Malo.

A tupu le faalavelave nei i fafo ia ona saili laia o se avanoa e malaga ai aua o le faiga a lea o tatou, le soifuaga o le Samoa ma le tatou aganuu e le mafai a ona nofo e tataua a ona malaga i se faalavelave e tulai mai. O tatou a ia o le atunuu e fai faalavelave. Ia ae se i silasila ane i le tulaga o le taugata o pasese o vaalele lea foi sa saunoa ai nisi o sui usufono. E fai a si taugata o le tulaga lea iai ma e iai lo'u taofi aua e le o se mataupu fou foi lea foi sa talanoaina i isi foi Tala o le Tupe ua tuanai ae le mafai ona tuua le tuitui atu pea. E manaomia se faatauvaga i le va lea o tatou ma Niu Sila, a leai se faatauvaga e le mafai ona sau i lalo pasese o vaalele. A o le mea foi lea i ai ua atamamai foi vaalele ia ma i latou e ana Kamupani Vaalele, a vave faatau ma vave totogi lou nofoa e pa'u, a e oo atu toe tolu aso ua tataua ona e alu i le

faalavelave ua toe o nofoa taugata la e totoe, ua taugata tele nofoa. Ia ae afai o le faalavelave, e totogi a aua e le mafai ona nofo e tatau ona alu, ia afai o le vaa tele foi lea ia oso atu na o le pisinisi kalasi la e totoe e te alu ai a i le pisinisi kalasi e tiga ona taugata e totogi a. Ia ae sei silasila ane aua e le o se mataupu fou lea foi a sa talanoa atu i lena foi tausaga ma le Tala o le Tupe ua tuanai. Pe leai se isi Kamupani vaalele foi lele e ave iai se laisene foi lea le tumau, se temporary license mo lenei vaitau sei tau fesoasoani ai. O lea lava o lo o toatele isi tagata o le tatou Atunuu o lo o ui mai Fiti, faaoga mai le vaa a Fiti. Ia ae a faapea e maua se fesoasoani faapea pe afai e le o vave maua mai se tatou vaa, ia o se tulaga lelei lena. A o le mea lea ua matauina e lou lava Sui i Kamupani vaalele ia ua iai ua matuai tele tupe e maua talu ona tatala borders mo feoaiga. E pei ua foliga mai ue tele, e oo foi a ia tatou i Samoa nei o vaiaso uma, vaiaso uma ou te vaai a i tagata malaga mai. O lea foi e tumu ia vaalele ia e omai a le Air Niu Sila, tele tau le maua foi ni avanoa o nofoa e malaga ai Niu Sila ma le fo'i mai. Ae sei silasila ane i vaega ia aua o lea na aumai nei faasilasilaga mai le Kamupani Vaalele a le Air Niu Sila, le ono masina lea e tau mai ia Iuni maua le latou tupe faasili e \$323 miliona tala Samoa.

FOFOGA FETALAI: Ia malie lau Afioga i le Taitai o le Itu Agai, ia le Sui mamalu mai Siumu o le a se mea o faafinagaloina.

Tofa Hon Tuuu Anasii Leota (Siumu): Lau Afioga e iai si mataupu lea e fia manino ai foi i le saunoaga a le sui, e le o iai se manatu e faalavelave. E pau a lau faafesili i le Afioga i le Taitai o le Itu Agai, ia o lea ua aumai lona finagalo e toe aumai se Vaalele. O lea foi na saunoa isi Sui e aumai se tatou Vaalele, la foi e alaga le Taitai Sili o le vaega lea faimai, e toe aumai se vaalelei. Lau Afioga, 40 tausaga o iai le vaega lea a matou sa matou iai ae leai se mealelei na maua mai vaalele nei lau Afioga. O lea la ou te faafesili atu ai, pe ua iai sona finagalo e fesoasoani i le Faigamalo, i tei ua aumai foi le vaalele aua o le tatou vaalele lea na uma atu nei, fa tausaga aumai le lipoti, gau, gau, gau. Le tatou Polenisia lea na iai lea iai ia faamaumauga a le Maota leni, na finau ai foi Tama matutua sa iai i le gau o le Polenisia, toetiti a gaumativa ai le Atunuu, fai foi le tatou paga ma le Virgin Blue, ia pei na gau le manuia foi le mea. Lea foi la na finagalo foi le Faigamalo ua tulai mai nei e toe faafoi le Vaalele faasaoina ai le fia miliona lea lau Afioga semanu e tigaina ai le Atunuu. A o le mea la lea, o le vaalele a ia e tatau ona iai se vaalele a le Atunuu, a lea foi ua saunoa i le taugata o pasese. Po o lou finagalo a aumai loa le vaalele, faapau loa pasese? Aua o le mea lena lea iai finagalo, o le mea foi lea sag au ai le tatou vaalele, e moi e iai le tatou agaga e fia faapau pasese ae a faapau foi le pasese leaga e tele tupe e faaalu. O le tupe totogi ai se lisi o vaalele, o tupe e faalele ai le vaalele, penisini, o totogi o mea e land ai le vaalele, o totogi o tagata faigaluega

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai lea ua ou maua atu le uiga o le faauilavea, faafetai lava, faafetai lea ua maua.

Tofa Hon Tuuu Anasii Leota: Ia lau Afioga, ia o lau faafesili lea, a faapea o lea ua iai sou finagalo e fesoasoani i le Malo tei ua aumai se vaalele ae faapea mai ua gau toe faapea foi lea sa le tatau ona aumai se vaalele ma le faaaloalo.

Tofa Hon LAUOFO FONOTOE NUAFESILI PIERRE LAUOFO: Ia e faigofie a le tali o le fesili.

FOFOGA FETALAI: Malo a faafetai, ia lau Afioga i le Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO: O lea ua saunoa ia le Afioga i le Sui mamalu o lea ua taua foi le tatou faipaaga foi lea ma le Virgin Blue. Ou te manatua le Paeaiga lena sa ou nofo mai luga i o ae saofai i luma i i o le Minisita. O ia le Minisita na faia le faiga paaga la lea faimai na gau, le Minisita le la lea na fai paaga ma le Virgin Blue, a lea na tatou o uma tatou matamata ai ina ua taunuu mai le vaalele i Faleolo, ia a o lea ua toe saunoa iai. Ia o le a toe saunoa i mea na e faia faaiuga ma lou taimi.

FOFOGA FETALAI: Malie lau Afioga i le Taitai o le Itu Agai leaga o lea ua taua le Sui mamalu sei tulai mai le Sui mamalu pe faamaonia ia tala.

Tofa Hon LAUOFO FONOTOE NUAFESILI PIERRE LAUOFO: E faamaonia, sa ou iai.

Tofa Hon Tuuu Anasii Leota: E moni le saunoaga a le Sui, o mea ia pei o tatou e aoao mai mea na tutupu. O lea la ua tutupu mea ia ave le fesoasoani i o ae aua tatou te taumafai e fai foi ni mea ia aumai foi se vaalele, gau ia ona toe faitio foi lea i le aumai o le vaalele.

Tofa Hon LAUOFO FONOTOE NUAFESILI PIERRE LAUOFO: Ia lea ua maua, faafetai lea ua maua ua faamaonia lau tala.

Tofa Hon Tuuu Anasii Leota: Ae moni lau tala ma lou faaaloalo.

Tofa Hon LAUOFO FONOTOE NUAFESILI PIERRE LAUOFO: Ia faafetai e ala ona ou taua le mea lea ona o lau tala na faiatu pe afai e lei oo mai le taimi e toe aumai ai se vaalele leaga o lea ou te taofi le saunoaga a le

Minisita, le Afioga Leatinuu e toe aumai se tatou vaalele ae le o le taimi lenei, o le uiga lena.

FOFOGA FETALAI: Pei se fautuaga foi lele alualu mamao.

Tofa Hon LAUOFO FONOTOE NUAFESILI PIERRE LAUOFO: Ioe, pei o le fautuaga afai e lei ready e aumai se vaalele i le taimi leni ia aumai la se isi ae ave iai se laisene le tumau, se temporary license foi lele e lele ai sei tauva ai ma le Air Niu Sila ia tau faapau teisi i lalo le pasese.

Tofa Ale Vena Ale: Lau Afioga i le Fofoga Fetalai.

Afioga Hon Mulipola Anarosa Ale Molioo: Lau Afioga i le Fofoga Fetalai.

FOFOGA FETALAI: Malie, sei faasaoina le taimi o lau Afioga i le Taitai o le Itu Agai, ia sei saunoa mai lau Afioga i le Minisita o Tupe.

Afioga Hon Mulipola Anarosa Ale Molioo: Ia, e faamanatu atu pea i le Taitai o le Itu Agai, o le taimi lenei o le matuai fausasaga o aikalafu a le tatou vaalele a le Samoa Airways. O lea lava e auauai mai totonu o le tatou paketi e togitogi, o lea foi uaamata tagi mai le UTOS, le Government guarantee la iai. Ia, lona uiga o le matuai fausasaga a o aitalafu, pei o le faaaliga manino lea i le tatou Maota.

Tofa Hon LAUOFO FONOTOE NUAFESILI PIERRE LAUOFO: Ia lelei faafetai manaia lau faaaliga.

FOFOGA FETALAI: Ia mo le faasaoina o le taimi o le Taitai o le Itu Agai,

Tofa Hon LAUOFO FONOTOE NUAFESILI PIERRE LAUOFO: Ia lea ua faafofoga mai lau afioga i le Minisita o Vaalele i le saunoaga a le Minisita o Tupe

FOFOGA FETALAI: Ia mo le faasaoina o lou taimi lau Afioga i le Taitai o le Itu Agai, sei tuu atu le avanoa tulai mai le Sui o Faleata Nu 4.

Tofa Ale Vena Ale: Faafetai lava i lau Afioga i le Fofoga Fetalai mo le avanoa, leai o le mataupu e pei ona saunoa iai le Afioga i le Taitai o le Itu Agai. I le matau atu i Paeaiga lea na tea nei o tala uma lava o le Tupe e 10 miliona e inject i totonu o le tologiina lea o aitalafu a le Samoa Airways. O lea la e matau atu foi e toe manao foi, ae a pe a taatia ia le Faigamalo ua tulai

mai nei, o lea foi ua saunoa mai le Minisita o Tupe o lea ua faamanino mai sei tau totogi nei aitalafu, aua o au a ia e pei foi ona ou tautala atu i le taimi ua sola e talosagaina le tatou Malo ina ia aua nei toe, ia faaitiitia mea nei o aitalafu. A tatou vaai nei i le mea lea ua tupu i isi Malo tetele o le lalolagi e pei o Sri Lanka o lea ua demand mai nei e le Malo Saina le malae vaalele o le uafu ma mea uma faapena e le fiaoo iai Samoa ina ituaiga mea faapena, faafetai lau Afioga.

Tofa Hon Leatinuu Wayne Soialo: Lau Afioga i le Fofoga Fetalai?

FOFOGA FETALAI: Ia mo le faasaoina o lou taimi, ia sei tulai mai lau Afioga i le Minisita

Tofa Hon Leatinuu Wayne Soialo: Atonu se i iai lava se avanoa ona fai atu lea o se lauga i le tulaga o le tatou Kamupani vaalele, ae le faapea o le a le tali atu le Malo, oloo iai foi se fesili a se tasi o Sui poo le a le mea ua oo i le tatou vaalele sei iai se taimi maua se avanoa ona fofola atu laia o le fala lau Afioga aua foi le tatou Kamupani Vaalele, faafetai lava

Tofa Hon LAUOFO FONOTOE NUAFESILI PIERRE LAUOFO: Ia o le mafuaaga tonu lena...

FOFOGA FETALAI: Ia malo, lau afioga i le Taitai o le Itu Agai ia see ese ia ma vaalele ae faaauau le saunoaga o lea ua manino se taimi tali le Minisita aua talosaga faaumiumi mo se vaalele i le lumanai.

Tofa Hon LAUOFO FONOTOE NUAFESILI PIERRE LAUOFO: O le mea tonu lena lau Afioga i le Minisita aua ana le faafoia le tatou vaalele ua leva lava ona uma ona totogi a tatou aitalafu na, ia faafoi fua ae taatia atu se taimi e saunoa e faamalamalama ia vaega.

Tofa Hon Leatinuu Wayne Soialo: Lau afioga i le Fofoga Fetalai...

FOFOGA FETALAI: Lea foi o le a toe tulai mai le Minisita talutalu ai lau afioga i le Taitai o le Itu Agai

Tofa Hon Leatinuu Wayne Soialo: Lau Afioga i le Fofoga Fetalai e oomai le faigamalo lenei i totonu, e oo i le 100miliona le aitalafu o le Samoa Airways ao la e tu le vaalele i o i Ausetaliai Brisbane, e le mafai e le faigamalo lenei ona aumai le vaalele i le tulaga o le aitalafu lena na iai atonu o le talitonuga lena o le la itu a gau a gau. Ae o le talitonuga o le itu lenei e le mafai ona tatou faia se atinae gau a fuafua iai o tupe a le tatou Malo lea e faatino ai o le mea lena lau afioga i le Fofoga i le Fetalai o le mafuaaga lena.

Ae ana aumai le vaalele lena i le taimi lena ma le 100milion lea e gau e faapenei pe ua 200milion le gau ae o le measili lena ua toe foi le tatou vaalele e lei oomai i Samoa lana faigamalaga ia ma le faaaloalo.

Tofa Hon LAUOFO FONOTOE NUAFESILI PIERRE LAUOFO: Ia faafetai.

FOFOGA FETALAI: Ia mo le faasaoina o lou taimi, sei tulai mai le Minisita o malae vaalele.

Tofa Hon Olo Fiti Afoa Vaai: Ia lau afioga i le Fofoga Fetalai leaga o lea ua talanoaina le faapea a aumai lava le vaalele ua a ma a ma a. O le vaalele e lei faamalieina lona saogalemu e aumai ai o le mea lena sa taofi ai e la'u Matagaluega ae o le gau ia faitalia ia pe gau pe leai, ae ua aumai le Lipoti mai o i le Kamupani foi lea o le Parcel lea sa latou siakiina le vaa e le faamalieina le vaa i lona saogalemu tatou te malaga ai ma malaga atu ai ma le Taitai o le Itu Agai ma Lautafi i Niu Sila poo se isi lava atunuu, o le faasaoga lena o le mea na le aumaia ai le tatou vaa, ae lea o le a taatia pea i le Minisita o Vaalele ai e le'o toe mamao ae onosai.

Afioga Hon Toelupe Poumulinuku Onesemo: Ia lau Afioga i le Fofoga Fetalai...

FOFOGA FETALAI: Ia malie a mo le faasaoina o lou taimi, ia sei tulai mai lau Afioga i le Minisita o Fesootaiga

Afioga Hon Toelupe Poumulinuku Onesemo: Faafetai ia o se mea puupuu lava lea lau Afioga leaga o lea na saunoa le Taitai o le Itu Agai e lei iai se vaalele ao lea na aumai. Sa iai le vaalele mai le 2017 ae oomai i le 2020 ua matuai tele lava le aitalafu lau afioga.

FOFOGA FETALAI: Lau afioga i le Taitai o le Itu Agai...

Tofa Hon LAUOFO FONOTOE NUAFESILI PIERRE LAUOFO: Ia e i ai se isi faauilavea pe ua uma...

FOFOGA FETALAI: Ia see ese ia ma vaalele leaga o lea o le a uma lou taimi.

Tofa Hon LAUOFO FONOTOE NUAFESILI PIERRE LAUOFO: O lea ua ou see ese, ae pau le mea o lea ua silafia ia o le vaalele lea e taua o lea e feleleai i Ausetalia, o le matuai lelei lava o le vaalele. Ae o le tulaga lena o lo o i ai o...

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Ia malie lau Afioga i le Taitai o le Itu Agai a iai lava se faaiu lavea e le mafai ona tuua leaga o le Malo, ae sei saunoa lau afioga.

Tofa Hon Olo Fiti Afoa Vaai: Ia o lena e sao le saunoaga o la e lele i Ausetalia le vaa lea ona na iai le tupe a le Kamupani Vaa lena e faalelei ai le Computer System o le vaa le la e pei ona ou fai atu ai. Ae na toe tagi mai ia le Kamupani Samoa e auvatu se tupe iinei i Samoa e faauma ma faaleleia le mea lea, ae leai se tupe o le mafuaaga lena.

Tofa Hon LAUOFO FONOTOE NUA FESILI PIERRE LAUOFO: Ia afai o iai ni aitalafu ma na mea o le taimi nei o outou fetagofi e fai ia lelei, fai se mea e tau ai le tou taimi ma tautaua ai outou ae le faapea o le a fai ma toso mai tua. Fai e outou se mea lelei o le taimi lena tulai mai

Tofa Hon Olo Fiti Afoa Vaai: Lau Afioga i le Fofoga Fetalai sa tatau ona e saunoa mai faapena sa tatau ona e saunao mai analeila, Olo ma Leatinuu fetagofi loa e fai le mea lea ua le mafai ona fai ona aumai loa lea o lea o le vaalele.

Tofa Hon LAUOFO FONOTOE NUA FESILI PIERRE LAUOFO: Lau Afioga i le Fofoga Fetalai ou matamata atu lava i News a le TV foi lea i le interview a le Samoa Airway oloo iai ona atugaluga.

FOFOGA FETALAI: Toe 3 minute o le sui usufono.

Tofa Hon LAUOFO FONOTOE NUA FESILI PIERRE LAUOFO: I le malae vaalele lea i Fagalii ae se i aumai se Lipoti i se taimi e saunoa i ai le Afioga i le Minisita e pei o lea e i ai lava le popolega i le Pou lea e i talaane o le Kolisi o Samoa ma o la e lei faia le 100mita lea na taua. Ae e iai la'u fautuaga lau Afioga i le Fofoga Fetalai tauala atu i le Afioga i le Minisita o lea ou te matau faafetai o lea ua ou sau nei olea ua lele atu le vaalele ua faaoga atu Fagalii malo lava le lototele, ae o le mea ou te vaai pe le mafai ona fai se fale e moe ai le vaalele i po aua o lea e matau e foi mai i Tutuila i lana malaga mulimuli tuu le pasese i Fagalii ona moe lea i Faleolo, usu mai le taeao. O le tele ia o le expense lena masalo... mai ai le faasalalauga o le a sii pasese. Aua o lea la puupuu le va lea a o lea taugata atu le pasese, lau Afioga i le Fofoga Fetalai

FOFOGA FETALAI: Ia malie lau Afioga i le Taitai o le Itu Agai se i tuu atu i le Minisita o Vaalele.

Tofa Hon Olo Fiti Afoa Vaai: So o se vaalele a e water proof, e tutu a vaalele i fafo ae...

Tofa Hon LAUOFO FONOTOE NUAFESILI PIERRE LAUOFO: Ae o lea la le mea e moe ai Faleolo ae tutu ai fafo i Fagalii.

Tofa Hon Olo Fiti Afoa Vaai: O la foi e moe i fafo.

Tofa Hon LAUOFO FONOTOE NUAFESILI PIERRE LAUOFO: E le timu ia Faleolo ae timu Fagalii.

FOFOGA FETALAI: Ia se i saunoa mai lau Afioga i le Minista o Fesootaiga.

Tofa Hon Leatinuu Wayne Sooialo: O le mea muamua e fia faasao e leai se siitaga o pasese o loo iai mai Samoa Airways mai Fagalii i Tutuila, o le mea lona lua e amata mai le flight mai Faleolo i le taeao ona toe moe lea i Faleolo ona oo e fai ai siaki o le vaalele, e leai se fale inisia e leai se hanger a tatou i Fagalii e siaki ai Vaalele mo le galuega mo lesi aso, o lea la iai le fuafuaga lena e amata mai Faleolo ae toe moe i Faleolo ona o le tulaga lena. O iina foin a e moe ai totonu o le hanger nae moe ai Faleolo.

FOFOGA FETALAI: Ia lau Afioga i le Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO: Lea ua e saunoa e faamanino ma faamatala le meatonu a lea ou te talanoa atu, fai se tatou hanger i Fagalii faamoe ai lea o le Vaa.

FOFOGA FETALAI: E toe 1 ma le afa minute le sui , pei o le vaega lea lau Afioga .

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai e fia faatu se lafo, ua tele tele faauilavea a le Minisita a lenei Taitai o le Itu Agai.

FOFOGA FETALAI: E 5 minute.

Afioga Sulamanaia Fetaiai Tauiliili Tuivasa: Ia lea ua faaluaina le lafo.

FOFOGA FETALAI: O le a avatu le fesili.? O ai e lagolagoina le lafo saunoa mai i le ioe.

FOFOGA FETALAI: Finagalo malie faamaea maia saunoaga a lau Afioga i le Taitai o le Itu Agai .

Tofa Hon LAUOFO FONOTOE NUAFESILI PIERRE LAUOFO: Lau Afioga aua e toe nai minute ia totoe o lea sou tofa toe faaauau taeao i le taeao nai e talosaga atu ai , aua e le

FOFOGA FETALAI: E leai e toe tasi le minute lea totoe ma faamaea ai loa le saunoaga, ma e maea nei a lau saunoaga.

Tofa Hon LAUOFO FONOTOE NUAFESILI PIERRE LAUOFO: Ae faauilavea soo Minisita ia, na ou maua loa le tala ou tatalo loa , ao male po tatalo tatalo vave maua se fofo o le gasegase lea tulai mai le Falemai . Faafetai lea ua afio mai le Minista o le Falemai , fomai Sosaiete Fomai , Sosaiete Tamaitai Tausi Mai , mafua i se a? aua foi e le faailoga tagata le mai . e le iloa le mai le laititi poo le matua , e lei iloa foi e le mai le tagata ua taualoa ma le tagata e le taualoa . E le faailoga Ekalesia foil le mai , ma e le faailoga foi le taimi e oso ai le mai , e oso ilea o , e oso i le po , e oso foi le po toe oso i le ao. A oso la le mai o le taimi la lena faigata ao le mea la lea ou te tatalo ia maua se fofo ona o le mamalu o le atunuu aua e leai se isi o tatou e le oo foi iai le mai , a oso la le mai a la iai le fomai sulu atu ai le falemai iai le fomai. O le mea la lea taua ai le galulue i le ao ma le po Tamaitai ma Alii Fomai. Aua nei galulue foi lea nao 8-5 afiafi ae ia muamua le avanoa.

FOFOGA FETALAI: Lau Afioga i le Taitai o le Itu Agai ua maea saunoa le Minisita i le tulaga lea, o lea saunoa atu se taimi.

Afioga Hon Valasi Luapitofanua Toogamaga Tafito Selesele: A ou tali o le atoatoa lava le tali e tuu atu ae o le ala na ou tu atu ia faauma loa le lauga ua uma le taimi faafetai .

FOFOGA FETALAI: O le mea tonu a lena lau Afioga i le Taitia o le Itu Agai ,ua maea saunoa le Minisita o lea faatali i sana saunoaga ina ia faatoamalie ai le atunuu e pei o lau saunoaga.

Tofa Hon LAUOFO FONOTOE NUAFESILI PIERRE LAUOFO: E pei o le mafuaaga lena , e lei sao lelei le vae o le uati , maua nai minute faafetai ia pei o le vaega lea tasi lea tulaga foafoaaga lelei lea ua ou vaai lea aumai i le lipoti a le Komiti o Tupe , lea tau faamatala mai ai se falemai foi mo fomai faapitoa masalo poo specialist ina ia tuu itiitia ai le ave o tatou mai i fafo. Ae faapea e fau ai le falemai ae o le fautuaga sei silasila ane i isi tatou fale, lea iai foi le falemai sa i Vailima ,e le mafai ona faaoga i ina.

Aua o mafaufauga foi ia na fai ma ou faalogo i le taimi na fau ai le falemai fou lea iai nei i Motootua , e manaia tele ese le manaia siitia le tulaga o le auaunaga lea mo le mamalu o le atunuu e ese le manaia.

Ae pei ona malie i isi saunoaga o lenei aso faalogologo atu iai pei a e fai le fale ao le anofale , tatou masini faaaoga i totonu o le falemai o masini e le taugofie masini e faaaoga , le taugofie foi taimi o foma specialist taugata ae pei o latou ia e faamoemoe iai lea foi a faamoemoega a le Malo ina ia tulai mai se tulaga lelei ma siitia ai le tatou auaunaga tau soifua maloloina, ina ia tutu itiitia ai tupe e alu fafo , lea sa ou maua le faaaliga a le Direct General le isi aso faapea e manaomia le 20 miliona mo gasegase ia auina atu i fafo . Ao lea te vaai atu ile Tala o le Tupe lea aumai i le lipoti a le Taitaifono e 5 miliona le tupe lea faagaga o lona uiga e le faigofie le galuega a le Afioga i le Minisita i le filifili poo ai e ave ao ai e le ave a pei o vaega ia .

FOFOGA FETALAI: Ia lea ua oo mai le tatou taimi malolo lau Afioga ile Fofoga Fetalai, ia faauma maia le saunoaga.

Tofa Hon LAUOFO FONOTOE NUAFESILI PIERRE LAUOFO: E faamaea atu taeao lau Afioga.

FOFOGA FETALAI: Leai e faamaea mai nei, ua maea lou taimi, ae o loo tele le avanoa e te talanoa ai i le mamalu o le Kapeneta.

Tofa Hon LAUOFO FONOTOE NUAFESILI PIERRE LAUOFO: E toe 2 a nai mataupu ia aua e pei o le mea lea taua ai mo mea o masini o equipment faaneionopo. A lea ua ta tonu le lima.

FOFOGA FETALAI: Ia malie se i saunoa mai le Palemiaq.

Afioga Hon Fiamē Naomi Mataafa: E talosaga atu i le Taitai le Itu Agai, malie ia lou finagalo o lea ua oo i le tatou taimi malolo o na ua fautua atu le Fofoga Fetalai e lelei a le tatou tausī o tatou tulafono.

FOFOGA FETALAI: Ua i ai le manatu ua maea e saunoaga a lau Afioga le Taitai o le Itu Agai , talu ai o lea lava e tuu avanoa atu le nofoa, ae people foi le nofoa i le vaavaai atu pei la solitulafono ai ma le nofoa, ui i lea faamalie atu faamalulu ua maea lou taimi. A iai nisi mea o totoe o loo aua le avanoa e te fesootai i ai aua lava le mamalu o le Kapeneta i se taimi.

Tofa Hon LAUOFO FONOTOE NUAFESILI PIERRE LAUOFO: Ia e pau a le mea lea ua ou toe tulai atu ai momoli atu le faafetai n, faafetai i lau Afioga , faafetai foi le au faauilavea i lenei aso ma le taumafai atu atonu

e maua foi se avanoa i se isi taimi . Ae faafetai foi mo le avanoa ua maua .
Manuia le iuga o le tatou fono lenei aso .

FOFOGA FETALAI: Malo faafetai, talu ai o lea ua oo mai le tatou taimi manava e tusa o le lafo faamaonia, e iai le manatu ua faaaogagase lava le paia o le tatou Palemene , ae tatou sailiili malosi mo le aso taeao, faamalo le usufono lenei aso , faamalo foi le onosai tatou talo soifua i le aso a taeao mo le alofa o le Atua , faaauauina o le tatou galuega , pea tatou tatala alofagia e le Atua lo outou afifio atu agalelei le Alii i toega o lenei afiafi.

Faafetai atu i le tapuaiga a Faauluuluga a Matagaluega, Faalapotopotoga Tumaoti a le tatou Malo aemaise foi le tapuaiga a si o tatou atunuu.

Ae tatou te le i tolopo e talosaga atu i le sui usufono mo Palauli 3 se i e saunia se tatou tatalo e faaiu ai le tatou fono.

Na tolopo Taulumaga a le Fono Aoaio Faitulafono i le itula e 5:05 i le afiafi seia aulia le Aso Lulu, 28 Iuni 2023 i le itula e 9.30 i le taeao.